

चुप रहियै प्रार्थना कर



वेद राहीं



चुप रहियै प्रार्थना कर



वेद राही

चुप रहिये प्रार्थना कर

G.M. College of Education
Raipur, Bantalab
Jammu.

Acc. No.. 552 (15)
Dated 9-9-2009

G.M. College of Education
Bantalab, Jammu

Acc. No. 22-2
Dated 22-2-2022

श्री शांति जी को

सह-मेह

वेद राही

17.3.04

चुप रहियै प्रार्थना कर

वेद राही

प्रकाशक

दर्शना प्रकाशन, मुम्बई

CHUP REHIYE PRARTHNA KAR

Collection of Dogri Poems by :

Ved Rahi

पैह्ला संस्करण : 2003

मुल्ल : 125 रुपेऽ

© : लेखक

प्रकाशक : दर्शना प्रकाशन

बी 2/35 सर्वोत्तम हाउसिंग
सोसायटी इरला ब्रिज, अंधेरी (प.)
मुम्बई - 400058

मुखपृष्ठ आर्टिस्ट : विजय सराफ मीनागी

शब्द संयोजन : मोनिका कम्प्यूटर डीजाईनर्स, जम्मू

मुद्रक : ग्राफिक आर्ट्स, न्यू दिल्ली

नमीं सदी दे नां

1.	चुप रेहियै प्रार्थना कर	11
2.	इक हत्थै दी ताड़ी	13
3.	कदें कदें सूरज	14
4.	न्हैरे जंगलै'च पगडंडी	17
5.	न्हैरा	20
6.	उच्चे किंगरें अड़के दा बदल	22
7.	गुआची दियां सोचां	25
8.	ओ कृष्ण ओ मेरे मन	27
9.	चक्की	29
10.	सार	30
11.	मोख	31
12.	भुचाल औने आला ऐ	33
13.	गब्बन कबूतरी	35
14.	मेरे चेहरे दियां झुरड़ियां	37
15.	तवी कुसै सुरंगा चा होइयै नेई लंघदी	39
16.	शब्द	41
17.	तरसाँद	46
18.	खुप्टी	47

19.	थैंक्यू माई पैन	48
20.	ईश्वर	51
21.	कार्डलैस	52
22.	कुप्पड़	53
23.	सद्गति	55
24.	इक होर जनम	57
25.	खजियारै दा टापू	60
26.	सिलसला	64
27.	बढ़ापा	66
28.	औंकर	67
29.	अज्ज रात बड़ी भारी ऐ	68
30.	अज्जकल	69
31.	बदलोखा	70
32.	नशेई रुक्ख	71
33.	गुनाह	72
34.	तेरा मिलना	73
35.	तुगी प्यार करने दे बाद	74
36.	दुई कोई अगग	75
37.	खीरले साह	76
38.	दिन इस चाल्ली गुजरा दे	77
39.	लदाख दी चिट्ठी मानसून दे नां	79
40.	ठुमरी गायिका	84
41.	मल्का पुखराज	86
42..	नर्तक	87
43.	सच्च	89
44.	प्यार	90
45.	रात	91
46.	कम्बल	92
47.	तीलें आली डब्बी	93

48.	अस लोक	95
49.	आदमखोर	96
50.	काल रात्री	97
51.	खड्ड	99
52.	शब्द गौतम ऐ अर्थ बुद्ध	103
53.	नाँ	104
54.	दलील	106
55.	रस्ते	108
56.	गुलमोहरा दा पैहला गुच्छा	110
57.	विदूशक	112
58.	अपने अन्दर	114
59.	दुबधा	115
60.	दोस्तोयेव्हस्की	117
61.	सुरक्षा	119
62.	किन्नियाँ कैदाँ	120
63.	कश्मीर 2000	121
64.	माँ	124
65.	धुप्प	128
66.	बूहटे	130
67.	सलाखें दे पार	131
68,	ईश्वर	132
69,	दुख	134
70.	सरकस	135
71,	इक तेज दरेआ आंगर	136
72,	ज्हाजा'च बैठे दे, बारी चा दिक्खदे होई	137
73,	लहू दा मोती	140
गज लां		
1.	बोलने दी सजा ऐ चुप रौहना	147
2.	घरै'च नेई जरोआ घर	149

3.	रहाड़े कन्ने आप सड़ै दी	150
4.	अजें थोड़ा लेहाज बाकी ऐ	151
5.	तेरी देह दी बाशना ऐ रात	152
6.	गुंझलें चा में तार खिच्चा नां	153
7.	अनलिखिएं लिखतें गी पढ़ियै	154
8.	अपनी बोल्ली आपूं लागे	155
9.	आदमी गी दिक्खो	157
10.	भरमें दी धुंधा इच पैंडे	158
11.	सूरज दा डुब्बना बी शैल	159
12.	बदलें कन्ने रिश्मां ब्होइयां	160
13.	कंडें इच हुन केह पलचोना	161
नमियां भाखां		
1.	नेई आखो लग्गी गोई लाम	165
2.	गुपचुप गुपचुप पुज्जा दे सनेह	166
3.	अस्सै नेई हे थ्वाड़े जोग	167
4.	भेतिए स'न्न लाई	168
5.	तुप्पे आप शकारी	169
6.	तूएं दरस्स तुगी कियां मनाना	170
7.	चित्त बरागी कित्त लाना	171
8.	तेरे दुखा ने किन्ने दुख जगाए	172
9.	थ्वाड़े कोल आइयै बनी जागे थ्वाड़े नेह	173
10.	अपने गै सामनै गुआचा देआं अस	174
11.	दुख बरूहपिए सुख बनी आए	175
12.	दीआ ते बुझाई लैता	176
	इ'नें कविताएं बारै इक चिट्ठी	177

चुप रेहियै प्रार्थना कर

चुप रेहियै प्रार्थना कर
तुगी परते थोडन,
चुप रेहियै अत्थरूँ कूहानियां
सनादे'न,
चुप रेहियै प्यार करदे न हत्थ,
चेता कर ओह घड़ियाँ
जेलै जीभ शब्द नेई
स्पर्श तुप्पदी ऐ,
केहड़ा भेत ऐ जिसी अक्खियां नेई
खो'लदियाँ ?
रंग ते खुशबो दा परिचे
उन्दी खमोशी गै,
धरती क्या बोलदी ऐ ओह धरती ऐ?
अम्बर जानदा ऐ उसी
सब्बै जानदे न,

जे दरख्त बी वोलदा तां कोयल चुप रौह्दी,
घरै दिएं कंधें कशा सिक्ख सैह्ना ते चुप रौह्ना
चुप गी पनछान
उदी शक्ति जान,
चुप इक कविता ऐ
सच्ची, सुच्ची
निश्कलंक
निरपक्ख
निरभौ ।

इक हत्थै दी ताड़ी

इक हत्थै दी ताड़ी
मेरी कविता
नेई सनोंदी, छड़ी
म्हैसूस गै होंदी,
छुपले पैरें औंदी ते
मेरे वजूद दी
लिखतै पर दसखत करी जंदी,
इयां बझोंदा
किश घटत नि होंदा
पर इक गुंगी गूँज
रूह गी टोंह्दी,
चुप दा लम्मां पैँडा
पीड़ बोलदी रौह्दी ।

कदें कदें सूरज

कदें कदें सूरज
इयां चढ़दा ऐ बदलें दे पिच्छुआं
जियां मुटमरजी कन्ने जागा करदा जागत
रजाई हटाइयै बी नेई हटांदा
दिक्खदा रौंहदा ऐ अक्खीं गुहाड़ी गुहाड़ियै
लो किन्नी होई, सीत किन्ना ऐ,

कदें कदें
छुट्टी दी घेंटी सुनियै
स्कूला बाहर द्रौड़दे जागलें साईं बी
सूरज बाहर औंदा ऐ
मन्त्रो दौं गैइयें इच गै उन्न
सारी धरती नापी लैनी ऐ,

कदें कदें सूरज
गुमटी उप्पर बैठा दा लभदा ऐ
भुच्चर बांदरै साई
बेहड़ै झांकदा छब्ब कियां लां,

केई आरीं
कुंगली कुंगली नुहार लेइयै
चढ़दा ऐ सूरज
जियां कोई जिगरी यार
झतोई जा चिरा परैन्त,

कदें कदें ऐसे दाड़े कत्रे
उप्पर उट्ठदा ऐ जियां
आई गोआ ऐ बागी कोई
दुनियां दा तख्ता पलटने ताई,

मते बेरी ओह
संन्यासी बनियै उब्भरदा ऐ
जोगिए रंगै'च गोतो गोत
समाधि लाइयै बैठा दा
इक्कै थाहर
ब्रह्माण्ड घूमदा ऐ उदे आर-पार,

कदें कदें सूरज
बंसरी चा कुरजदे
पंचम सुरा आंगर

निकलदा ऐ
बरिन्दावन दी रचना करदा
गोपिएं गी आले दिन्दा,

कदें कदें सूरज लभदा ऐ
उंबलदा उंबलदा मेरे साईं
जेलै में औनां तुगी मिलने ताई
मेरे कशा अग्गें
द्रौड़दियां न
मेरे'चा निकलने आलियां किरनां

न्हरे जंगलै' च पगडंडी

कोई जादूगर
अपनी छड़ी भुल्ली गेआ ऐ
जेहड़ी
पगडंडी बनियै इस न्हरे
सुनसान जंगलै'च पेई रेह्दी ऐ,
नां हुन एह कुसै गी
सुआली सकदी ऐ, नां बझाली सकदी ऐ,

जां कोई अजगर
इस न्हरे सुनसान जंगलै'चा
बल्लें-डोल लंघी गेआ ऐ ते
अपनी कंजली इत्थैं
छोड़ी गेआ ऐ.....एह पगडंडी,

जां दरेआ दी कोई

बेचैन लैह्र इत्थैं नस्सी आई ऐ
बसांऽ करने आस्तै
ते पेई रेह्दी ऐइकरुख, इकडाल,

जां एह् कोई याद ऐ
भलेआं भलोई दी
इक्कलसोखी होई दी,

सोचें दी कोई मरगाई
असमाना दी गैह्राई इच
गुम होई गेई दी ऐ ते
उदा इक फंग डिग्गी पेदा ऐ इत्थैं
एह् पंगडंडी
कुसा क्हानी दी कोई लाईन ऐ
जेह्ड़ी कताबा'च छपोई नेई
सद्गति होई नेई,

जां एह् 'गालिब' दा काई मिसरा ऐ
जेह्ड़ा कुसा गी नेई समझोआ
ते खीर जाड़ा आ'नी मोआ,

जां एह् धरती दे अन्दरा दी
पीड़ ऐ, जिसी उन्न
सीकना चाहेआ - सकोई नेई
डक्कना चाहेआ - डकोई नेई
फुटिट्थै बाहर निकली ते
जंगला दी छाती चीरी गेई,

में इस पगडंडी दे सिरे पर
अब्लभोटै खड़ोई रेह् दां
एह् मिगी मेरे वजूद साईं बझोआ दी ऐ
डुब्वने आले दी चीक
जेह्ड़ी कुसा नेई सुनी
मिगी सनोआ दी ऐ.

न्हे रा

चन्न त्रुटेआ ते उदे तोटे
न्हरे दे दरेआ इच
रु'ढ़ी गे.....
स्थिली गे इक्कै फूकै ने तारे,
कुप्पड़ें अक्खी मीटी लेइयां त्राहियै
रुक्खें दा सबज लहू जम्मी'आ
जढ़ें इच जाइयै,
फौजी बूटें हेठ मंघोए दा घाऽ
चट्टना भुल्ली गेआ
अपने जखम,
मिट्टी दे अन्दर कीड़े
रुकी गे जनम लैंदे लैंदे
मीणक करलाइयै गोता मारी गे
खूहै इच दूर तैही तोड़ी,

गलियां मोए दे सप्पें आंगर
घर बंद कबरां
हवा मरा करदे बमारा दा
साह् ,
इस ग्रां दे उप्परा लंघे हे
लामां दे छौरे
किश रोज पैहलें ।

उच्चे किंगरें अड़के दा बद्दल

उच्चे किंगरें अड़के दा बद्दल
सैहमे दा, त्राहे दा
अन्दरो अन्दरी कम्बै दा, इस डरै जे
इयां खड़ोते खड़ोते कुतै
बर्फ गै नेई बनी जा, ते
बर्फ बनियै म्हेशां लेई
इनें टीह्रसिएं गै नेई टंगोचा दा रवै,
साह्र रोकियै बैठा दा ऐ
व्हाऊ दे इक फंडूके दी उआई इच
जेहड़ा उसी डुआइयै
खलकिएं केरिएं रुलकाई देयै
एह्रदा वजूद पिघलै ते
मस्त होइयै निक्कियां निक्कियां
कनियां बनियै

डबिएं-द्रब्बड़िएं गी सेड़दा
छर छर करदे झलारें च बगी जा
तत्ते कुप्पड़ें पर सीरां बगाइयै
उनें गी अपने उप्पर
चबात बुज्झने दी अनुभूति देई जा
ओह्दे अंदरा सतरंगी पींगां
निकलन ते कूजें दियां कतारां
उनें पींगे बिच्चा डुआरियां भरदियां
ओह्दे स्वातमै गी
सार्थक करी जान;
ओह्
गद्दिया दी भाख बनी जा, ते
गद्दनै दा चीरा सेड़िए
उदी देहू दी खशबो कत्रे
चौनें चूकें फैली जा
कुक्कड़िएं गी सैल्लन देइयै
मनुक्खी हथें दा मान ते
परसे दी चमक सुआई करी देयै
खब्बल बनियै
मीलें तोड़ी बिछी जा
ढुनखरें पर गुत्थ बनियै फुट्टै
ते उन्दी जढ़ें गी
मुड़ी मुंढा
उप्पर उट्ठने ते गास
पलाम्बने दी तांहग देई जा,

मिक्ती'च रलियै
मिक्ती दे धुर अन्दर जा ते
अपने निस्तारै दियां
कोरजां तुप्पी लै

उच्चे किंगरें अड़के दा बद्दल
ब्लाऊ दे इक फ़ंडूके दी
उआइ' च बैठा दा...

गुआची दियां सोचां

कुत्थें गेइयां ओह् कवितां
जेह्ड़ियां में सोचियां, पर लखोइयां नेईं
पिच्छूं किन्ना सोचेआ
पर ओह् चेतै नेईं आइयां
बथेरा तुप्पेआ, तल्होफेआ
पर
रात बीती जाने पर जियां
तारे छप्पन होई जंदे'न
ओह् कवितां बी गुआची गेइयां,
क्या ओह् उयै कवितां हियां
जेह्ड़ियां
मेरे दोस्त शायरें लिखियां ते
जिनें मेरा मन मोही लैता ?
हां! ओह् उयै हियां

ओ मेरे दोस्त शायरो !
में थुआड़ा शुकरगुज़ार आं
तुसें मेरियां सोचां ज़ाया नेई होन दित्तियां
पर जरा इद्दर दिक्खेओ
कुतै मेरियां लिखी दियां
कवितां
थुआड़ियां गुआची दियां सोचां ते नेई ?

ओ कृष्ण ओ मेरे मन

युद्धक्षेत्र दे बशकार
आई खड़ोता ऐं तूं
कुसै होर दा रथ लेइयै
नेई लड़ने दी सगंध खाइयै
तेरी सैना
शत्रु आले पासै
तेरे सामनै खड़ोई गई ऐ
ओ कृष्ण ओ मेरे मन !

इस लड़ाई दा अंत
तुगी भाखा ऐ
तूं संधी करान, समझान गेआ हा
पर अ'त्रे शत्रु गी
कु'न समझाई सकदा ऐ

एह तुगी पता हा
फी बी तूं गेआ हा की जे
इस पासै जां उस पासै
जिन्ने वार करने'न
तूएं करने'न ओ कृष्ण ओ मेरे मन
जिन्ने वार जरने'न
तूएं जरने'न ओ कृष्ण ओ मेरे मन ।

चक्की

चक्किए ! चक्किए !
कुसा दी नेई सक्किए
होर प्ही होर प्ही होर प्ही
में नेई करगा सीऽ
करी दे इन्ना बरीक
रवै नेई थवीक
तेरे कशा बक्ख होने दी
इक-मिक होई जाचै
संझै साईं घरोई जाचै
अक्खरें साईं सलेटै'रा
पंझोई जाचै।

सार

अपने अन्दर जाने दे
सारे दरोआजे बाहर गै
तुप्पने पौंदे'न
मूरत बनानी पौंदी ऐ
अनदिवखे दी,
असमान सिरजना पौंदा ऐ
उड्डने ताई,
शब्द घड़ियै चुप्पा दी सार
समझौंदी ऐ,
दुख झल्लियै आखन हुन्दा ऐ
नंद आई'आ, नंद आई'आ, नंद आई'आ।

मोख

अपने आपै गी में
खलारेआ नेई, बंडेआ ऐ
कदे कूहानिए'च कदे कविताएं'च
कदे उपन्यास लिखदे होई, कदे नाटक
कदे कैमरे'च कल्पना गी
साकार करदे होई बी में
अपने आपै गी बंडेआ ऐ,
शीशे दे भाएं किन्ने टुकड़े होई जान
उन्दे'च लब्बने आला अक्स नेई भज्जदा
ओह् हर टुकड़े'च
साबत गै रौहदा ऐ,
हर बारी साबत-सपूरा गै बंडेआ ऐ में
अपने आपै गी, मते बारी
गल्लें गल्लें ते कदे चुपचाप

कुसा दी अक्खीं च दिक्खदे दिक्खदे;
कदे कुसा दा हत्थ अपने हत्थै'च लेइयै में
अपने आपा गी प्रवाहेआ ऐ
ते कदे नकेबले बैठे दे
साहे साहे बी में
अपने आपै दा मोख दित्ता ऐ।

भुचाल औने आला ऐ

मिगी एह आगम की होआ जे
भुचाल औने आला ऐ?
हर वेलै कंधां कम्बदियां ते छत
ढोंदे लभदे'न
में मलबे हेठ दबोए दा रौह्नां
लोकें गी कम्में'च रुज्जे दे दिक्खियै
मन डुब्बदा रौह्दा ऐ
एह भोले भलोके लोक
बचैरे अनजान
इनें गी पता गै नेई जे
भुचाल औने आला ऐ
धरती डोलग तां केह् करडन?
कु'न बचाग इनें गी?
हाय !

मन करदा ऐ जे इनें गी दस्सी देआं
पर कियां दस्सां?

कियां सनां?

जिसी बी सनाड ओह् मेरे साई
मरने'शा पैहलें गै मरी जाग

भुचाल औने आला ऐ तां आई जा
उदे औने दा त्राह्
उदे औने कशा मता
जानलेवा ऐ ।

गब्भन कबूतरी

गब्भन कबूतरी डौर भौर
काहली पेदी नकेबला तुप्पा दी
जित्थैं आंडे देई सकै,
पीड़ां जागी पेई दियां'न .
गुटर गुटर करदी, फंग फड़फड़ांदी
थाहर थाहर दिक्खा दी
कोई मघार, कोई गुट्ठ, कोई ओह्ला,
घरें दियां दुआरियां बंद'न
गुमटिएं पर बैठे दे बांदर घुरका दे
परनाले कच्छ बिल्ली उदी तक्का'च ऐ
रुक्खै पर सप्पा दी जीभ लपलपा दी
कुतैं होर उड़िड्यै जाई नेई सकदी
इल्लै दियां नजरां उदै धुर गर्भैं तोड़ी
तहड़ी दियां ,

केह करै कुत्थैं जा?
किन्नी नढाल-बेहाल
फी बी आंडे ते देने गै'न
भाएं भुंजा गै की नेई डिग्गी पौन
भज्जी गै की नेई जान
आँडे ते देने गै'न ।

मेरे चेहरे दियां झुरड़ियां

समें दियां सपकंजां,
खाह्शें दियां झरीटां,
जिन्दू दियां दरेड़ां

एह झुरड़ियां
झुरकदियां रीझां,
बित्तीतांदे लहू दियां
सुक्कियां सीरां,
अनबुज्जे सुआल,
नेई कीते दे गुनाह्,
अनउग्गे दरख्तें दियां जढ़ां,
गैबी सारतां,

एह झुरड़ियां
नेई परतोने आलें दी

निहालपा'च पाई दियां औंसियां,
तेरियां ओह नजरां
जेहड़ियां
परतोइऐ नेईं गेइयां
मेरे कोल गै रेहियां।

तवी कुसा सुरंगा चा होइयै नेई लंघदी

दिक्खो कियां बगा दी ऐ

तवी

कुप्पड़ें गी गुतलूं करदी

गड़ाके मारदी

हवा गी बत्तर दिंदी

सज्जै-खब्बै रुक्खें-बूचड़िएं गी

बाह्मां लुआरी लुआरी

वेव करदी

गासा पासै फ्लाईंग किसेस सुट्टदी

एह् आदमी दे दमाका चा

निकली दी अवाज नेई

नां गै एह्

दिला'चा निकली दी दलील ऐ

एह् शरीर दे पूरे लहू दी

गर्दिश चा औने आला सुर ऐ
बांदा, मोकला
बंधनहीन
एह तवी ऐ
एह कुसा सुरंगा चा होइयै नेई लंघदी।

शब्द

किन्ने शब्द पिड़ा दे बाहर होई गे'न
कंठे बेही गे'न
नमोशी इच
हून उनें गी कोई नेई बोलदा
उन्दे अर्थ
दैहशतजदा मुसाफरें साई
लाईफ बोटे'च बेहियै
डुब्बा करदे ज्हाजें गी छोड़ी गे'न ;

उद्दर किन्ने शब्द
उंबली उंबली लाईनां त्रोड़दे
सक्योरिटी चैकिंग आस्तै
अगें बधा करदे
सम्भावनाएं दे नमें असमान तुप्पन

उन्दा ग्लोबलाईजेशन होई गेआ ऐ
विश्ववाजार दी गद्दी उनेई
आले मारै दी ऐ ;

दिक्खो एह शब्द
दुएं शब्दे गी कियां
चाएं चाएं कोल ब्हालै दे
अपनी ताकत बधाने ताई ;

उद्दर किन्ने शब्द
तक्क लाइयै बैठे दे
छब्ब लाइयै दूएं दे अर्थ
खोही लैने आस्तै ;

किश शब्द अपनी खूबसूरती कशा
तंग आए दे
जना-खना हत्थ मारै दा
बेमतलब ;

किश शब्द चौरै पैहर
नक्क चाही रक्खदे
नखरीले, पेखन करदे
कुसा दे मुंह नेई लगदे ;

केई शब्द हिरखी, दरेआदिल
अपने आपै गी पूरा खोलदे
लेखकें दे सामनै
जियां प्रेमिका अपने प्रेमी सामनै
निरवस्तर हुन्दी ऐ ;

मते शब्द तबले दी थापा साई न
अर्थे दे घुंघरू उनेगी
घेरदे, भलखेरदे
उन्दे पिच्छें लग्गी पौंदे न
दोयै पागल इक दुए दे हिरखा'च
नच्चदे रौह्दे मस्त होए दे
लगातार, इकतार ;

चुप रेहियै बी बोलदे'न शब्द
न्हरे'च जुगनुएं साई
प्रार्थना'च अत्यरुएं साई
प्यारा'च हर्त्थें साई' ;

किन्ने शब्द अर्थे दा भार नेई ढोंदे
मतिएं बोल्लिएं च इक्कै जनेह् होंदे
उसलै बोलदे जदूं
मां दुब्ध पलेआ दी होंदी ऐ
कोई प्रेमिका प्यार करै दी हुन्दी ऐ
जां कोई म्हानू डुब्बा दा होंदा ऐ

जां जेलै कोई खढारी
गोल करी लैंदा ऐ
जां कोई गायक कोई ऐसा सुर
लांदा ऐ जेह्दे'च
उस दी आत्मा होंदी ऐ,

केई ऐसे शब्द बी हैन, जिन्दे कशा
लेखक संगदे, त्रांह्दे'न
ओह् शब्द अतीत इच
कुसा महान लेखक गी
अपने सुआतमै दी खीरली बूंद
देई चुके दे हुन्दे'न;

ओभड़ हत्थें'च आइयै
शब्द चूहें आंगर मरदे'न
कुत्ते दी मौत बी;

अर्थवान शब्दे गी तुस
सलेटा पर लिखियै मस्हाई ओड़ो
उन्दे अर्थ फी बी
बाकी रेही जाडन;

शब्दे'च समुन्दरा जित्रा
असमाना जित्रा अर्थ भरी ओड़ो

उन्दा अकार
उन्ने दा उन्ना गै रौह्ग
ओह् फुलदे नेई;

पानी'च लब्भा करदे
तारें साईं समझो
शब्दें गी, ते
उन्दे अर्थ उप्पर दिक्खो
असमाना पर चमका करदे;

शब्दें'च रंग हुन्दे'न
स्पर्श हुन्दे'न
खुश्वो हुन्दी ऐ
रंगे'च तस्वीरां हुन्दियां'न
स्पर्शे'च परिचे हुन्दे'न
खुश्वोएं'च साद्दे हुन्दे'न,

एह् दिक्खो एह् शब्द
जनम लै करदा ऐ
दिक्खो कियाँ
सोचै दी कुक्खा चा निकलै दा ऐ
इदी सिरजना करने आले हत्थ
कियां इसी सा'रा करा करदे'न
कियाँ नाडू-छेदन होआ करदा ऐ इदा
कियाँ एह् दुब्ध पीया करदा ऐ

तरसाँद

इक्कै बारी
तुगी मसूस करियै
गल्ल मुक्की नेई
अस बची गे
केह् होना हा जे
हर बारी
तरसाँद
बाकी नेई रौह्दी?

खुप्टी

अपनी खुप्टी इच बड़ेआ....में

रेशमां दे कीड़े साईं

अन्दरा

फर फर करदियां

तितरियां निकलियां

कविताँ बनियै ।

थैंक्यू माई पैन !

तुगी छोड़दे होई मेरा मन उदास ऐ

ओ मेरे पैन !

निब्ब खुंठी होई गई

स्याही लीक होआ दी ऐ

में मजबूर आं तुगी बंद करियै

अपने टेबल पर इक पासै

रक्खने पर ,

तूं भाएं मेरे शरीर कत्रे जुड़े दा नेई

पर मेरा मन बनियै तूं

मेरे हत्यें राहें

केह् केह् नेई लिखेआ?

कित्रियां क्हानियां, कवतां, फिल्मां

उनें सभनें' च

जो किश बी हा ओह् मेरा बी हा ते

तेरा बी
मेरे हर जच्चे दा भ्याल हा तूं
तेरे करी मेरा किन्ना नां होआ
पर अपना नां तूं
कुतैं नेई लिखेआ
मेशां मेरे दस्तखत
तेरे दस्तखत बने दे रेह ,
में तेरा शुकरिया अदा करनां
थैक्यू माई पैन !
हून बशक्क तूं मेरा कम्म नेई करगा
पर मेरे सामनै पे पे दे तूं मिगी
एह सचाई दसदा रौहगा जे
इक रोज मेरी तफीक बी
मजबूर होई जानी ऐ ते
मेरी सोचें दी शकती ने बी
मेरा साथ छोड़ी जाना ऐ इक रोज
पर क्या तदूँ
मेरे साई ओह उदास होग
जेहड़ा मिगी अपना पैन बनाइयै
अपनिएं सोचें दा इज़हार करदा ऐ ?
कु'न ऐ ओह ?
कोहदे हत्थै दा पैन आं में ?
कुस ने मेरे राहें
अपने मनै दियां बारियां खो'ल्लियां न ?
ओह कोई ऐ बी जां

मेरी सोच गै उसदा वजूद ऐ ?
जां फी उसदे वजूद आंगर
मेरा वजूद उत्रा गै ते नेई
जिन्ना तूं मेरा मन बनियै
मेरे हत्थै राहें लिखदा रेहा ?
ओह् मेरी सोच ही जां तेरी ?
ओह् मेरी तफीक ही जां तेरी ?

ईश्वर

आदमी कोल जरुरत कशा मता
आई जा तां ईश्वर दी
जरुरत पौंदी ऐ
कदें कोई जरुरत पूरी नेई होयै
तां बी उदी लोड़ होंदी ऐ
डुब्बदे आदमी गी जरुर
लभदा ऐ ओह
डुब्बी डुब्बियै तरने आले गी बी ;
सच्ची गल्ल ऐ मिगी पता नेई में
कुत्थूं आया इस करियै ईश्वर ऐ
मिगी पता नेई में कुत्थैं जाना
इस करियै ईश्वर ऐ
जदूं में नेई होड तां बी ओह्ह होग,
मेरी इच्छा उसी जानने दी नेई
उदी इच्छा करने दी ऐ ।

कार्डलैस

सुखने तेरा सनेहा आ'नदे न मेरे कोल
तेरे औने दा, कदे नेई औने दा
कदे मेरा सनेहा बी मिगी दिंदे' न
उनें गल्ले बारै जेहड़ियां में
सोचदा नेई ,
कदे कदे मेरे सुखने
मिगी उसदा सनेहा बी दिंदे' न
जिसदे बारै पता गै नेई जे
उसदा वजूद ऐ बी जां नेई
जे उसदा वजूद गै नेई तां
सुखने उसदा सनेहा कियां आ'नन ?
इस कार्डलैस दा कोई सुच्च
कोई पलंग
कुतै ते ऐ, कुतै ते ऐ ।

कुप्पड़

मिट्टी दे अन्दर दबोए दा
में इक कुप्पड़
सदिए दे न्हरे इच
चुप्पा दी बुक्कल मारी बैठे दा
पास कदें नेई परतेआ
कुसी पता मेरे अन्दर
छप्पी दी इक मूरत ओचन
(गर्भे इच अयाने साईं)
जिसदा रूप अनजांता
मिगी नचिल्ला बौह्न नि दिंदा
सौन नि दिंदा
कुलबुल कुलबुल करदी जेलै
ओह् अनघड़ मूरत
मिगी बझोदा अजब

कियां बड़ी मेरे अन्दर ओह
ज्हारें-लक्खें सालें थों
उत्थैं बेही रेही दी
साह् उस दा की नेईं घटोंदा ?
फी सोच औंदी
मिम्मीं ते बैटे दां
ज्हारें लक्खें सालें थों
इस कैदा इच
दौनें दी इक्कै मजबूरी

कदे कदे विश्वास जागदा
मिट्टी इक दिन हटग ते
में बाँदै साह् लैना
एह मूरत अनघड़ी नि रौहनी
शैल सनक्खी दिब्ब जोता साईं
लटलट इस दे रूप ने बलना
जेतै इसी ओह रूप ऐ थोना
तां में इस दे अन्दर होना
अज्ज जियां एह मेरे अन्दर ।

सद्गति

अज्जा तोड़ी में
मता किश ओह लिखेआ
जो
में लिखना नेई हा चांहदा,
सोचा करनां
जो में लिखना चांहदा हा ते
नेई लिखी सकेआ
उसी हून
इक थैलिया'च पाइयै
कुसा पिप्पला पर टंगी ओड़ां
अस्थिएं साईं
औने आली पीढ़ी जेकर
चाह्ग तां
मेरी सद्गति आस्तै

इनें अस्थिएं गी
रढ़ाई देग
कुसा गंदे नाले इच ।

इक होर जनम

पैहलें में मां दी कुक्खा चा
जनम लेआ हा
हुन मिगी अपनी भुब्बली चा उटटना ऐ ,
अजें मिगी अपने लहुआ' च
गर्दश करदियां ओह तांहगां
पूरियां करनियां' न, जेहड़ियां
मोए दे मनुक्खा गी बी
साह नेई लैन दिंदियां ,
अजें में नेकिएं दा ओह
कर्जा बी चकाना ऐ, जेह्दा
ब्याज मूल थों बधी गेदा ऐ,
मेरे नौहें
ओह गंढां अजें खो'लनियां'न
अपने स्वातमै' च जेहड़ियां में

आपूं गै पाइयां हां,
इच्छाएं दे ओह ऐगड़ अजें
में तुप्पने न जेहूड़े
दूर उच्चिएं धारें
गुआची गेदे'न - भरमें दी घूडै' च,
उनें नाडुएं दा पानी
अजें में पीना ऐ जेहूड़े
मेरा नां लेइयै कुरजे हे,
रुक्खें दिएं गंठें पर
फुटट्टने आले गुथें साईं
दिब्व वोलें दे गूढ़ अर्थें
मिगी लो देनी ऐ .अजें,
उस खब्वलै पर
अजें में चलना ऐ
जेहूड़ा मेरी निहालपै' च
तरेलू कन्ने सिज्जी दी
कोसी कोसी धुप्पै दे तरले
पा करदा ऐ जे
ओह
उसदे वजूद गी मेरे औने कशा
पैहलें सकाई नेई ओडै,
अपने अन्दरै दे उस
जांगली घोड़े गी में अजें
काबू करना ऐ जेहूदा बजूद
ओहूदी अज़ादी इच गै,

अजें इस बजारै च आ'नियै
में ओह चीजां-बसतां खरीदनियां न
जिन्दी छड़ी साईं गै दित्ती ही,
ओह गीत बी
अजें में
गाने' न, जिन्दे छन्द ते हैन
पर बोल
हाली अनघड़ै गै रेही गेदे' न,
एह मेरा दूआ जनम ऐ
पैहलें में मां दी कुक्खा चा
जनम लेआ हा
हून मिगी अपनी भुब्बली चा
उट्ठना ऐ ।

खजियारै दा टापू

चम्बे ते डल्होजी दे बशकार इक शैल सुन्हाकड़ा थाहर ऐ, 'खजियार' बिलकुल गुलमर्ग ते सन्नासर आला लेखा । दब्बड़ै दे मझाटै उत्थै इक सर ऐ, सरै दे बिच्च इक टापू ऐ, निक्का सारा, जेह्दे पर खब्बल, ससूटे वगैरा उगगे दे' न । ओह् टापू इक्कै थाहर खड़ोता नेई रौहदा, ओह् बल्लें बल्लें इद्दर-उद्दर सुरकदा रौहदा ऐ । एह् कविता उसै टापू दे नां ऐ ।

खजियारै दे नील सरै इच
इक टापू ऐ, जिसगी कुतै
खड़ोत नई ऐ
जुगें जुगें थों चला गै करदा
अज्ज इस कंढै, कल उस कंढै,
एह् धरती दा ऐसा टुकड़ा
जिस गी उसने
अपनी गोदा थाहर नि दित्ता
लाड नि लाया, प्यार नि दित्ता

क्या एहू कोई थम्म-पुत्तर हा ?
जिसगी जमदे सार गै
मां ने डोबन लाया, पर
इसदे अन्दर जीने दी
हुब्ब ही ऐसी
मां दे कार-बिहार दी इक चुब्ब ही ऐसी
जिसने इसगी डुब्बन नेई दित्ता
सरै दे डूँहगे खोब्बे बिच
खुब्बन नेई दित्ता
इक्कले-मुक्कले काहूले पेदे जयाने साईं
हाम्बै करदा अम्मां पासै
लड़ फड़ने दे जतनें पेदा
पर बेबस ऐ
पैर कुतै अड़का नेई करदे
धरती मां दी चूहक अजें इक
फड़दा गै तां
आप मुहारै
मजबूरी ने अगैं रिढ़दा
अज्ज इस कंढै, कल उस कंढै,

कदें कदें मीं इयां बझोंदा
एहू ते ऐ मेघदूत दा
यक्ष भलोका
डूँहगे सरै इच कैद होए दा
पर पैरें बेड़ी नेई पेदी
तड़फा करदा, छड़का करदा

कठें ने सिर भन्ना करदा
मिगी बझोंदा एह
उस मरगाई आंगर, जेहड़ी
गोली खाइयै खल्ल पेई गेदी
पर जिसदी उड्डने दी तांहग
टंगोची रेही दी
गासा उप्पर म्हेशां लेई,
इदी प्रेमिका दा प्यार
इसी आले मारै दा
एह चौन्नीं बक्खीं हाम्बै दा
सूकां सुट्टै दा
इदियां सूकां सुनियै
चीड़ां सूकन लगन
गुबर मनै दा जदूं धनोदा
डुब्बी जंदी खजियारै दी सारी घाटी
धूडै इच, ते
ओह्दे इच एह आपूं बी
डुब्बी जंदा,

कदें कदें मीं इयां बझोंदा
एह टापू
गासै थों त्रुट्टे दा इक तारा
उसदी सारी चिल्क-मिल्क ते
हिसली गेदी, पर अंदरै दी
अगग नि बुज्जी
तांहग मनै दी अजें उसी

साह लैन नि दिंदी
हर बेलै उम्बलै-बिम्बलै दा
अज्ज इस कंढै, कल उस कंढै,

कदें कदें मीं इयां बझोंदा
एहू टापू नेई - मेरी दिल ऐ
मेरे गै अन्दर बैठे दा
एहू मेरे गै हथ नि औंदा
दिल दियां खाहूशां दिला दे हथ नेई
सरै दा टापू सरै दे बस्स नेई ।

सिलसला

जंगलै' च सप्प न, चिड़ियां' न, शेर' न
किन्ना किश ऐ
किश ब'रें बाद इन्दे चा
कुसै नेई रौहना
सप्प एह् नेई होंडन
चिड़ियां एह् नेई होंडन, शेर बी नेई
जंगल बी एह्का नेई होना.
इनें बूहटें दे थाहर दूए बूहटे
इनें जीवें दे थाहर दूए जीव
पर लोक इयै गलाडन
एह् उयै जंगल ऐ
उयै सप्प' न, उयै चिड़ियां, उयै शेर
एह् सिलसला चलदा गै रौहना
समां जंगलै चा हवा बनियै

बगदा गै रौहता
बगदा गै रौहता

बढ़ापा

रस्ते च बैठा दा अजगर
दूरा औंदे राह्रांदू गी बलगा दा
किन्नी मजबूरी ऐ
अजगर लब्बा दा ऐ, पर
राह्रांदू उद्दर गै जाग
परतियै नेई औग

औं कर

समां गिड़कां नेई खंदा

अम्ब खंदा ऐ

आडू खंदा ऐ

बैर खंदा ऐ

मता किश खंदा ऐ

गिड़कां नेई खंदा

कीजे गिड़कें दे अंदरा

औंकर फुटदे' न

उन्दे चा समां जनम लैदा ऐ ।

अज्ज रात बड़ी भारी ऐ

होई-बीती आंगर, अज्ज रात बड़ी भारी ऐ
भित्त' न दुआस, न्हैरै डुब्बी दी दुआरी ऐ।
कुसै दी उआई इच सौंगल अडोल ऐ
सैह्की सैह्की सैह्मी गेदी बत्त अनभोल ऐ।
साह् रोक़ी गैलीं इच्चा ब्हा इयां लंगै दी
देहू कशा आखो जियां आत्मा ऐ संगै दी।
सुंगड़ियै बेही रेही दी खुट्टी पर निम्मोज्ञाणी
स्थिती गेदा दीया हुन मुक्की गेदी ओह्दी कहानी।
चन्न चेतें आले अज्ज चिरै दे घरोई गे
झुरकदिएं सद्धरें दे झौंगरे घनोई गे।
स्वासें आंगर बारोबारी तारे डुब्बी जारदे
तारें कन्ने हीखिएं दे सहारे डुब्बी जारदे।
अक्खिएं च अनमुक्क नींदरै दा घोट ऐ।
जिन्द ऐ जां आह्लड़े चा डिग्गी पेदा बोट ऐ ।

अज्जकल

ध्याड़े इयां लंघै करदे' न
जियां
दुश्मन दे अलाके चा
फौजां ।
साह् इयां आ-जा करदे न
जियां
रस्ता भुल्ले दे
घाल पैछिएं दे डुआर ।
प्यार इयां होआ दा ऐ
जियां बितै थमां बद्ध
कोई पाँडी
नेआ दा ऐ भार ।

बदलोखा

नां तेरे हास्सें दी धुप्प
नां तेरे चेतें दी ब्हाऽ
बूहूटे सारे चुप चुप
पत्तरे दा निकलेआ त्राह
कैसा बदलोखा लगा
भर दपैहरिया
कुप्पड़ जन इक बेही गेआ
मेरी छातिया
इसी हटा
तूं बरखा बनियै आ ।

नशेई रुक्ख

बरखा' च गोतोगोत
होए दे रुक्ख
तेज हवा च
इयां झुल्ला करदे' न जियां
मनै' च गुनाहें दे सप्प
झूमदे न;
बरखा थम्होग, हवा रुक्क
तां एह् नशेई रुक्ख
चुपचाप
सम्मने-सीले खड़ोई जाडन
पर सिज्जे दे पत्तरे परा
बूँदां चौंदियां रौह्ड़न
टप्प-टप्प, टप्प-टप्प
टप्प-टप्प ।

गुनाह

किन्ना लज़ीज़ हा ओह गुनाह
किन्ना तृप्त करने आला
उदा चेता औंदा ऐ तां
वैसा कोई होर गुनाह
करने दा मन गै नेई करदा
किन्ना उपकारी हा ओह गुनाह
किन्ना मंगलकारी ।

तेरा मिलना

तेरा मिलना
सूरज दे आंगर ऐ
देहू चा रिश्मां फुट्टदियां न
आत्मा लो बनियै
उड़डन लगदी ऐ ।

तुगी प्यार करने दे बाद

तुगी प्यार करने दे बाद

मेरे कोल

कक्ख नेई बचेआ

त्रेल फुल्लें च आचरीं गेई,

फुल्ल झीलै' च डुब्बी गे,

झील बदलें' च गुआची गेई,

बदल घाटिएं पर ब'री गे

दुई कोई अग

दुई कोई अग बी

ऐसीं गै होग

बेहतर ऐ

इस्सै च जली जा

खीरले साह

सुक्के दे छप्पड़ै' च
तपे दे कुप्पड़ै' पर
मच्छियां लैदियां खीरले साह
आपूं गी दित्ता असें
इस्सै चाल्ली दाह
नां कोई हुब्ब, नां कोई चाह
नां रेह दा साह-बसाह
आपूं गै सकाया सारा पानी
आपूं गै एह ताया असें ताऽ
होयै कियां अरोचार
करै कु'न उपाऽ
उस गी कु'न समझा
जेहड़ा आपूं अपनी कुल्लिया
अगग ला ?

दिन इस चाल्ली गुजरा दे

पत्तार बूहटें' रा झड़ा दे
बगदे पानी पर पवा दे
हौली हौली चुपचाप रुढ़ा दे
दिन इस चाल्ली गुजरा दे ।
पिंजरे खुल्ले दिक्खियै पैछी
इक इक करियै उड्डरा दे
दिन इस चाल्ली गुजरा दे ।
दूर दरेड्डे जाने आली
बस दे मसाफर
इक इक करियै
अपने अपने पिंड उतरा दे
दिन इस चाल्ली गुजरा दे ।
नमें बने दे

डैम इच्च जीयां
इक इक करियै
ग्रां डुब्बा दे
दिन इस चाल्ली गुजरा दे ।
रातीं गासा ढलियै आए दे
त्रेलू दे कण
धुप्प निकलने पर
जिस चाल्ली
फी अम्बरै गी हाम्बा दे
दिन इस चाल्ली गुजरा दे ।
महानगर इच आइयै
जीयां
बारो बारी
सुखने स्हाड़े त्रुट्टा दे
दिन इस चाल्ली गुजरा दे ।

लदाख दी चिट्ठी मॉनसून दे नां

(‘स्हाड़े देशा’ च लदाख गै इक ऐसा अलाका ऐ जेहड़ा हिमालिया पर्वत दे उस पार ऐ। उत्थैं मॉनसून दे बद्दल नेई पुज्जदे । इसै करी इन्नी उचाई पर हुंदे होई बी ओह् इक रक्कड़ ते रेतला अलाका ऐ । १९६२ ई० च मै उत्थैं गेआ तां यह कविता लिखी ।)

मेरी छाती उप्पर लेटे दे
लम्में रेगस्तान
दिनें इन्ने तत्ते ते
रातीं इन्ने ठंडे होई जांदे’ न जे
मेरे हड्ड - एह् रक्कड़ फाड़
अन्दरोगोचरी तिड़कन लगदे’ न;
लक्खें सालें थों एह् तिड़कन
मेरा स्वातम बनी गई दी ऐ,

बदल ब'रदे नेई
टाकी टाकी छड़े लभदे' न
गासै पर, जियां रुस्से दे जयाने
दूर जाई खडौंदे' न;
ब्ला धुप्पा मती गर्म
छामां ठंडी ठार
दमाजड़ी सोचा आँगर बगदी ऐ,
दरेआ सिंध
इक नालिया साई इयां
बगदा ऐ जियां
लिस्सी फंग मादा याक दे
दुखै दी धार,
मेरे बसनीक
एह् मेरे लोक
मेरे कन्ने इयां चमड़ियै
रौहदे' न, जियां
पिंडे कन्ने मैलू दियां पपड़ियां,
ओ मेरे मित्तरा !
समुन्दरा देआ जाया - ओ मौनसून !
कदेँ इद्दर बी फराटी मार
लक्खे सालेँ थोँ में करै नां इंतजार
इक बारी ते भगवान बुद्ध बी
आए हे
यशोधरा दे द्वार ।
तूं डरा ते नेई करदा

जे इत्थैं आइयै
खाली होई जाडन तेरियां मशकां ?
नेई ओ मेरेआ
अनदिकखेआ मित्तरा -
बिछड़े देआ सज्जना !
तूं मिगी इक बारी आइयै सेड़
में तुगी म्हेशां म्हेशां ताई
गोतोगोत करी देड अपने हिरखै कन्ने ;
मन करदा ऐ जे
में
अपनी छाती उप्पर लेटे दे
रेगस्तानें इच चलुब्बी मारियै
धुर हेठ उत्थैं
जाई पुज्जां समुन्दरा कच्छ
जित्थैं
तेरा जनम होन्दा ऐ ते
हेटोहेठ खिच्चियै छपैलियै
में तुगी इत्थैं - अपने कोल
हमालिया दे पार लेई आवां
पर एह् सोचदे सार गै
मेरे रोआँह् खड़ोई जंदे' न
ते में
खमानिएं दे बूह्रें साई
कम्बी उट्ठनां जे तूं
हमालिया दे पार इस खुशक गुट्ठा

उठी आया तां
पंजाब दे खेतरेँ गी
खाई जाग जरकान
डाफ लग्गी जाग गंगोत्री दी कुक्खा गी
रेगस्तान दलांघां भरग
दक्खना आले पासै
बंगाल दी हवाएँ दा जादूँ
धुप्पा दी अग्गी' च फकोई जाग
नर्थ होई जाग
नेई नेई मॉनसून नेई
तूँ नेई आवेआं इत्थैँ इस भिट्टी दी -
दूर बैठी दी धरती कच्छ
मेरे कलापे
लक्खें सालें थमां मिगी
थ्हागै दे न, अगें बी इनें
मेरे कन्ने गै रौहना ऐ ;
दोस्ता !
मेरे जीने ताई एह
गौह घट्ट ऐ जे
एड्डा बड्डा मुल्क जिस
मॉनसून दे स्हारे जींदा ऐ
में इक्कले उसदे बगैर
जीया करनां ?
मेरा न्होरा तूँ
मनै कन्ने नेई लायां

में ते छड़ा मनै दा
बुआल कइढेआ ऐ,
मिगी पता ऐ,
नां तूं हमालिया टप्पियै
कदे मेरी सेजा तोड़ी औना
ते नां में
तेरे गले' च कदे
बाह्रमां पानियां ।

ठुमरी गायिका

ठुमरी गांदे गांदे ओह् मुस्कराई
तां मिगी बझोआ कोई जयाना
बरखा' च सिज्जियै नच्चन लगा ऐ,
जां फुल्लें भरोची डाली पर
कोई तितरी बैठी ते ओह् झुम्मन लगी,
उदा ठुमरी गांदे मुस्कराना
इयां गै हा जियां पूजा करदे करदे
अत्थरूँ बगी पौन,
कोई खढारी जेलै गोल करदा ऐ तां
ओह् असमानै आले पासै दिक्खियै
हत्थ उप्पर चुक्की लैदा ऐ ,
उसलै उसी ओह् लभदा ऐ
जिसी ओह् जानदा नेई ,
गिरजा देवी गी बी

ठुमरी गांदे गांदे
ओह लब्धा होग
तां गै ओह मुस्कराई ही ।

मल्का पुखराज

पहाड़ै' शा बिछड़ा दी
नदिया दा रोदन,
इक्कली कूजा दा बुलारा,
चीड़ें दी पागल सूँक,
जंगलें गुआची दी कूक,
ढक्कें ढक्कें चढ़दी भाख
बददलें साईं
चार चफेरे छांदी,
मद्धम सुर -
केरिएं सुत्ते दे फुल्ल,
फेरमां तानां -
कन्नें पेदे कुंडल,
बोल - जियां हवा' च
सिम्बल खिल्लरा दा ऐ ।

नर्तक

अड्डियां इयां चकोइयां
जियां गिल्लुयै मुंह खो'ल्लेआ दुद्ध पीने आस्तै,
बाह्रमां उल्लरियां मन्नो
बरखा च सिज्जा करदी खजूरै दी डाली
बहाऊ दे फनूके ने उप्पर चकोंदी ऐ,
मुंडी दा लुआर लक्कै दी लैहरै ने
भ्याली पान लगा,
अक्खीं दा अशारा हुमकेआ तां
तारे ने चन्नै गी सुआई दिती,
उंगलियां इस चाल्ली लैहराइयां
मन्नो कूंजें दे डार बिच्चें बारें
अग्गे-पिच्छें डोलन,
सुर ते ताल राहें उदी देहू ने
जेहड़ी कहानी आखी -

ओह मनै च इयां उतरी जियाँ
अक्खीं' च नींदर औंदी ऐ,
उदे आसै-पासै दा संसार
बिन्दराबन साई
मीरा दे गीतें दी सरगम बनियै
मेरी नजरें गी
मोर-फंगा दे रंगें' च रंगी गेआ ।

सच्च

में आखेआ

“बस इयै सच्च ऐ,

एह्दे छुट होर कोई सच्च नेई”

इन्ना आखदे गै में दिक्खेआ

ओह् सच्च उत्थैं नेई हा ।

प्यार

में इयां प्यार कीता
जियां
दिन चढ़दा ऐ
नदी बगदी ऐ
बूहटा फलदा ऐ
रात छांदी ऐ
नींदर औंदी ऐ ।

रात

न्हैरें 'च छड़ी
टटीहरी दी बाज गै सनोचा दी ऐ
इकतार, लगातार
न्हैरा जिन्ना गाढ़ा हुन्दा जा करदा ऐ
ओह्र होर बी उच्चा करलाऽ दी ऐ -
'में इत्थैं आं - में इत्थैं आं'
मिगी नींदर नेई आवै दी
औने आले सुखने गी
अपने अजन्मे रेही जाने दा
भौ खान लगा ऐ
ओह्र करलान लगी पेआ ए -
'में इत्थैं आं, में इत्थैं आं'।

कम्बल

दिन बल्लें बल्लें
इक कम्बल बुनने' च
लगा रेहा सारा दिन
संजै'लै उन्न उसी
काले रंगा च रंगी लेआ
फी उदी बुक्कल मारी
ते चुपचाप सेईं गेआ ।

तीलें आली डब्बी

सूरज हर रोज चढ़ेआ ते
हर रोज डुब्बा
ते डुब्बदे डुब्बदे मेरा इक दिन
खसकाइयै लेई गोआ-हर रोज
मिगी पता बी नेई लग्गा ते
मेरे मुहें पर लखोई गोआ-
फिफ्टी प्लस,
में इक इक दिना दी
इक इक तीली बालदा रेहा
ते हून पता नेई
किन्नियां तीलां बाकी'न
इस डब्बी इच
खो'लिए दिक्खी नेई सकदा
(कोई बी दिक्खी नेई सकदा)

नेई दिक्खी सकने दी
मजबूरी गै हून मिगी मता किश-
मता किश करने गी
प्रेरा दी ऐ ।

अस लोक

जला करदे दरख्ता पर
टुरा करदियां कीड़ियां
अस लोक ।

आदमखोर

में आं आदमखोर
अपने आपै गी खा करनां
घुटट् घुटट् पीयै उमर
त्रेह मटा करनां
साह् साह् बिच लग्गी दी अग्ग
जलदा गै जा करनां
जलदा गै जा करनां
जदूं नि रौह्ग एह् भुक्ख
जदूं नि रौह्ग एह् त्रेह
जदूं नि रौह्ग एह् अग्ग
तदूं नि रौह्ना में
तदूं नि रौह्ना में
तदूं नि रौह्ना में ।

कालरात्री

गलियां चुप्पनच्छक बो मढ़ियां बोलदियां
धड़कन रुकी मनै दी घड़ियां बोलदियां ।
सत्त समुन्दर पार एह कुस ने सरेआँ बाली
समाँ बजांदा ढोल ते जड़ियां बोलदियां ।
मुल्लां, जोगी आई बौढ़े मरधूड़ां लाई
जोगन थर थर कम्बै छड़िया बोलदियां ।
रत्त मत्थै पर लाई जादूँ लिखदे जंदे
मंशा कुसने धारी नड़ियां बोलदियाँ ।
खोपड़िँ दे दीएँ इच लहु-मिंझ बला दी
चारै चक्क जो मेखां तहड़ियाँ बोलदियां ।
बंद दुआरी दरवाजे, चीका दी रूह
कोठे-कंधां कम्बन कड़ियां बोलदियाँ ।
कुत्ते फबियां चामचड़िकां रोन-रड़ान
काल-रात्री आई मढ़ियाँ बोलदियां ।

रोको इनें वेतालें गी एह् आदमखोर
सिरें दियां जो फसलां रढ़ियां बोलदियाँ ।

खड्ड

खड्ड दिनें सौंदी ऐ ते रातीं
जागदी ऐ, रोंदी ऐ
पर इसदा रोना कोई नेई सुनदा
नां फ़ाड़, नां दरेआ, नां बौलियां
नां झौंगर
ग्रां दे कन्नें च बी इदा
रोदन नेई पौंदा;
एह धरती दी इक ऐसी आंदर ऐ
जेहदा लहू सुक्की गेदा ऐ
सड़ी-पड़ी गेई दी ऐ, हून इसदा
कोई अरोचार नेई;

एह खड्ड कॉमा' च पेदा मरीज ऐ
जेहदे कशा सभ तंग पेई गे दें' न

मनोमन

सबै उदे मरने दी प्रार्थना करदे' न
नां हिली-डुली सकदा ऐ
नां किश खाई सकदा ऐ ओह
गल्ल बी नेई करी सकदा
पर दूएं दियां गल्लां ओह सुनी सकदा ऐ
इस खड्डा दी इयै टरैजडी ऐ
एह जींदी ऐ, पर
मोएं दे कोला बद्ध मोई दी;

एह इक ऐसा मुड़दा ऐ
जिसी नां कोई दबांदा ऐ, नां जलांदा ऐ
जंगलें छिन्ना पाए दा ऐ एहदे कन्ने
नग्गर इसी भिट्टा थापदे' न
राहरांदू बी बची बची लंघदे' न
इदा होना, नेई होना इक बरोबर ऐ;

पता नेई कदूँ
फ़ाड़ें इक बेसुरी बंसरी बजाई
जिसी कुदरत ने मंजूर नेई कीता
ते उसदी सरगम ऊर्मा च पेइयै
घटोई, घनझोई ते
एह खड्ड बनी गेई;

मन्नो बसोहली दे इक
बेमसाल चित्तरै पर
कुसा कां ने बिठ करी दित्ती होयै
एह् खड्ड उआं गै
धरती दे मत्थै बनकोई दी ऐ;

एह् खड्ड कुसा हिरखी दी
नीझा साईं ऐ
जिसी प्यारा दा जवाब नेई थोआ
ते जेहड़ी दिक्खदे दिक्खदे
बंझर होई गेई;

बरसांतीं इदे' च हाड़ औंदा ऐ
पर पानी एह्दे चा इयां
लंघी जंदा ऐ जियां कोई शराबी
वेश्या दे कोठे परा होइयै
जल्दी जल्दी
न्हैरे' च गैब होई जंदा ऐ;

एह् खड्ड दलित जातिएं दे
मना' च पेई दी दरेड़ ऐ
सदियां गुजरी गेइयां
एह् होर डूंहगी होर डूंहगी
हुन्दी जारदी ऐ;

एह् खड्ड परनकोटा दी

उस मां दी
जखमी योनी ऐ
जेह्दे राहें उन्न कदें
अपने पुत्तरै गी जनम दित्ता हा
ते फी उसै पुत्तरे दे सामनै
इक रोज
उदी मिट्टी पलीद कीती ही
दैहशतगर्दे ;

जोकी धरत अश्वथामा दी
आयू भोगा करदी ऐ
ते एह् खड्ड
उदे मत्थै दा नासूर बनी गई दी ऐ
इस नासूरा दे अन्दर
ओह् चिक्कड़ ऐ जेह्दे' च
महारथी करन दा रथ फसे दा ऐ
अज्ज बी ;
एह् खड्ड भीशम पतामां दी
तीरें आली सेज ऐ
जेह्दे उप्पर समें दी सोच
बसुर्त पेई दी ऐ
नेई - हून इसी जगाने दी लोड़ ऐ
लोड़ ऐ इक भुचाल दी
जेह्ड़ा इस खड्डा गी झुनकी देयै
एह्दा अन्दर बाहर आई जा
बाहर अन्दर चली जा

शब्द गौतम ऐ, अर्थ बुद्ध

शब्द कुप्पड़ ऐ ते
अर्थ मूरत ऐ उदे चा घड़ोई दी
शब्द इक पक्खरू ऐ
अर्थ उदी तांहग गासा पलमोई दी
शब्द कंडा ऐ अर्थ उदी चुब्ब
शब्द अपना ग्रॉ, अर्थ उदी हुब्ब
शब्द हवा ऐ, अर्थ सुआस
शब्द अनदिक्खेआ सुखना
अर्थ उदा एहसास
शब्द जीवन ऐ, अर्थ भुक्ख
शब्द भुक्ख ऐ, अर्थ दुक्ख
शब्द युद्ध ऐ, अर्थ जित्त
शब्द इक किला ऐ, अर्थ उदा भित्त
शब्द गौतम ऐ, अर्थ बुद्ध
शब्द में आं, अर्थ दुब्ब

नां

मेरा नां मेरा नां ते ऐ,
पर में नेई
बोझे पेदा शनाख्ती काड ऐ नां
गुआची जा तां दूआ बनाई लैओ
अखबारा' च इश्तेहार देइयै
नां बदलोई जंदा ऐ
आदमी कन्ने नां जुड़े दा ऐ
नां कन्ने आदमी नेई;
फ्हाड़ी कलमें दिएं बेशमार
तस्वीरें उप्पर
कलाकारें अपने नां नेई लिखे दे
क्या एह् तस्वीरां उन्दी पनछान नेई ?
असें गी उन्दा गौह् नेई मान नेई ?
अजंता, एलोरा दिएं कलाकृतिँ पर

कुसा अपने दस्तखत नेई कीते दे
पर उन्दी आत्मा ऐ उन्दे' च
उन्दा लहू ऐ
उन्दे परसे दी खशबो ऐ
फी इस नां दे पिच्छें
इन्ने उट-नट की ?
इन्ने पुआड़े की ?
इन्ने साड़े की ?

दलील

शुकरिया मेरे दोस्त
तू मिगी नकारेआ
तेरा मिगी नकारना
मेरे होने दी दलील ऐ;
तू' भाएं मेरे कन्ने नेई बोल
तेरा एह् दखावा
दस्सा करदा तेरे अन्दरै दा तोल,
जानीं बुज्झी जिसी तू
भुलाऽ करना
बेध्याने इन्ना अह्म उसी
बनाऽ करना
काटा कुसा दे बजूद उपपर गै
मारेआ जंदा ऐ
जे मेरा वजूद गै नेई तां

तेरे काटे दी केह लोड़ ?
'न्हां' आखना बी 'हां' आखने दी
इक सबील ऐ
तेरा भिगी नकारना
मेरे होने दी दलील ऐ ।

रस्ते

किश रस्ते असें गी लभदे' न
पर केइएं दा बजूद - दिक्खियै बी
छड़ा हुन्दा ऐ मसूस;
किश रस्ते दिला चा होइयै लंघदे' न
किश गुआची जंदे न जंगलें इच
किश असें गी टोरदे दूर
किश बन्नी लैंदे संगलें इच;
किश कंडे चोभदे' न
किश चिक्कड़ा' च खोभदे' न;
किश लेइयै बैठे दे फुल्ल
किश दोखिएं सतुल्ल;
केई सगंध नेई खंदे
किश सरीकें दे बेह्रै लेई जंदे;
किश रस्ते दिंदे' न दलासे
किश खोही लैंदे ओठें दे दनासे

किश लो बनियै अक्खी' च चमकदे
किश गर्भजूने' च जाई गुआचदे
किश दिंदे' न कोरजां
किश स्हाड़ा लहू पींदे;
किश रस्ते खिच्चदे' न
किश खचोंदे न
केइएं कशा भाएं किन्ना बचो
पैर उथैं गै रखोंदे' न;
किश रस्ते दीदल
किश सम्मने-सीले
कइएं कच्छ हेजलियां कथां
केइएं कोल छड़े हीले;
केई पलेसैं दे जाल पाई बैठे दे
केइएं लाई दियां छबीलां
किश रस्ते मित्तरें गी नखेड़दे
केई करदे मेलने दियां सबीलां;
किश रस्ते लंघदे तारें बिच्चा
कल्पना दे गुबारें बिच्चा
केई गरीबें दी कुल्लिया होई जंदे
हिसली दी चुल्लिया होई जंदे;
केई त्रेहाए दे रस्ते
उनें म्हानुएं दी निहालपा' च बैठे दे -
जिन्दे पैरें छाले होन
जिन्दे पिंडें परा परसे चौन
ऐसे रस्ते, ऐसे पैर
असें गी थ्होन, असें गी थ्होन ।

गुलमोहरा दा पैह्ला गुच्छा

इस ब्हारा
गुलमोहरा दे फुल्लें दा
पैह्ला गुच्छा सैह्वन गै
नजरी पेआ तां
इयां बझोआ
जियां कन्ने कन्ने सुत्ते दे
सैह्वन गै तेरा हत्थ
मेरी बाँह पर आया ते
प्यारा दा पल जागी पेआ;
जां जियां
कविता लिखदे लिखदे
चानचक्क कोई
ओचन उपमां सुज्झी गेई;
मन्नो जियां

केइएं दिनें थों बंद पेदे
टैलीफोन दी घैंटी
बज्जी पेई ऐ अचनचेत;
अशकै
अनसंभ खलकतै इच
अब्बलभोटै
कोई अपना झतोई' आ;
इस ब्बारा दा
एह् पैह्ला गुच्छा
भाएं इसी में
आला नेई हा दित्ता, पर
इस ने ते औना गै हा
अपने बेलै सिर ।

विदूशक

सारा किश ते नाटक नेई ?
फी मेरे अन्दर जेहड़ा विदूशक ऐ
मिगी समझदा की नेई ?
कदें कदें ऐसा ब्यंग करदा ऐ
जेहड़ा मेरे थों जरोदा नेई
मेरे तड़फने पर ओह्र हसदा ऐ
में उसी गालीं कड़ढनां
ओह्र होर हसदा ऐ
में हुक्म दिन्नां ओह्र दफा होई जा
ओह्र जान लगदा ऐ, में उसी रोकी लैनां
में उसी पुच्छनां ओह्र इन्ना
बेरैह्म की ऐ ?
ओह्र रोन लगदा ऐ
मिगी हासा आई जंदा ऐ;

शकुन्तला नाटक दे खीरले अंक' च
कोई बिदूशक नेई, की जे
दुश्यंत गी पता लग्गी चुके दा हा जे
शकुन्तला ने सच्च बोलेआ हा जे
उदी कुक्खा' च दुश्यंत दा गै ऐंश ऐ
उत्थैं बिदूशक दी लोड़ नेई ही;
मेरा बिदूशक कदूं मेरा पीछा छोड़ग ?
कदूं मिगी पता लग्गुग जे
सच्च केह् ऐ ?

अपने अंदर

कदें कदें मिगी अपने अंदर बैठे दे
राक्षस कशा डर लगदा ऐ,
ते कदें अपने अन्दर
इक डरपोक गी दिक्खियै
अफसोस हुन्दा ऐ,
अपने अन्दरा दे धोखेबाज गी दिक्खियै
हासा बी औंदा ऐ,
ते अन्दर बैठे दे लालची कशा
घबराहट होन लगदी ऐ,
पर कदें कदें अपने अन्दर
इक प्यार करने आला बी लभदा ऐ
जेलै ओह् झमाणी लैन लगदा ऐ तां
मिगी उदे पर प्यार आई जंदा ऐ ।

दुबधा

मेजा पर आरकां टकाइयै
ठुड्डी तलिंग पर रक्खियै
दुबधा बैठी दी ऐ - चुपचाप
सोचें दा इक भित्त खुल्ला ऐ
इक बंद ;
हस्सने लेई खचोए दे ओठ
रबड़ा साईं
अद्धे गै खचोए दे ;
चिट्ठी लिखियै लैटरबाक्स च पाई दित्ती
नां-पता लिखे बगैर
मनां च तसल्ली ऐ कुतैं पुज्जग नेई ;
कमरे' च फड़फड़ाँदा
फांमां होए दा कबूतर
कंधा कत्रे चमकिए

तस्वीर होई गेदा
लोदान खुल्ला ऐ, पर
बाहर नेई जंदा ;
ढक्की दी पिट्ठी पर
कुब्बा साई लदोए दा
कुप्पड़
रुलका नेई करदा
नां गै भलेआं बनकोए दा
लोक आरदे, जारदे ;
घोड़े साई हर इरादा
सड़का दे बश्कार
अड़ी गेदा, शांटे दी मार
उदा किश नेई बगाड़ी सकदी
दुबधा उदे पिछले
दौनें पैरें दे मझाटै
चैड़ी हुन्दी जा करदी ऐ ।

दोस्तोयेव्स्की

भुक्खा बमार बच्चा
मौती कशा डरी गेआ
पीड़ भरोचा इक अत्थरुँ
उदी अक्खी चा ब'री गेआ
गौतम बुद्ध ने
उसी अपनी तली पर
चुक्की लैता
दोस्तोयेव्स्की ने झट्ट उसी पी लेआ
उदी आंदरें' च अगग लग्गी
लहू भखन लगा
उन्न भखन बाहर कड्ढी
अपनी कहानिएं राहें
फी बी सारी उमर
उसी मिरगी दे दौरे पौंदे रेह

दुखें दा कोई अलाज नेई
अदूं बी नेहा
अज्ज बी नेई ।

रूसी भाशा दे महान उपन्यासकार फ्योदोर दोस्तोयेव्की दे उपन्यास “द कैरेमज़ोव ब्रदर्स ” च इक गरीब स्वाभिमानी बच्चे ‘ इलिया ’ दा करैक्टर ऐ, जेहड़ा खीर मरी जन्दा ऐ . एह कविता उदे कशा मुतासर होइयै लिखी गई ऐ .
एहबी सच्च ऐ जे दोस्तोयेव्की जी मिरगी दे दौरे पैंदे हे .

सुरक्षा

में अपनी सुरक्षा आस्तै
जेहड़ा घर बनाया हा
हून उदे' च
में नेई रौहदा
ओह घर मेरे अन्दर रौहदा ऐ
उसदी सुरक्षा
मेरी सुरक्षा कशा
मती जरूरी होई गेई ऐ ।

किन्नियां कैदाँ

कोई अपने शलैपे पर मुग्ध
कोई अपनी लेआकत दे घेरे' च बंद
कुसा गी उस दी ताकत ने
जकड़ जप्फा पाए दा,
कोई फसी गेदा अपने इस घमंडा' च
जे उसी कोई घमंड नेई,
कोई अपनी अजादी दे
नशे दा गुलाम, समझी ऐठे दा जे
उसी कोई गुलाम नई
बनाई सकदा,
किन्नियां कैदां ।
किन्नियां कैदां ।

कश्मीर २०००

किन्ना न्हेरा ऐ
किन्ना न्हेरा ऐ
डुस्की डुस्की एह् क'न ऐ रोआ दा ?
रोने आला नजर नि आवै दा,

फुल्ल चेहरे धुआँखियै बुज्जे
जखम चुपचाप
पीड़ गुमसुम ऐ
बाँझ होई गई सिहाड़ें दी
मिट्टी, भुक्ख उगगा दी
खेतरेँ, खुम्बें
बर्फ बुनना लगी ऐ
डंडकाराँ
रोकियै साह्

देआरें ते चीड़ें
सूँक अन्दर कुतैं
दबाई लेई ऐ,
नेजे, नशतर
करन लगे गुतलूँ
हसदे हसदे गुलाब रोन लगा
पैछी पैहलें जो
चुप निहे रौहदे
घाबरी गेदे सनान केह
कुस गी ?
किशितयाँ नाउमीद कंठें ने
जाई लगियां न कंबदे कंबदे
धारा धारा
बिछे दे परछौरे
कोई सूरज कुतैं नि लब्बा दा
बदल जंगलें' च
जाई छप्पे दे
ज्हेलमै इच बगा दा
लहू किन्ना
नाच नंगा कसाईखानें इच
बेहयाई गड़ाके मारै दी
सट्ट लाई कथाहर यारें गै,
अम्बरै पर न "नाग" ★
उड़डा दे
डैहल खाइयै "हिमाल" ★

कंवा दी
काला मैन्तर एह कुसने
पढ़ेआ ऐ ?
'लल' दे वाख दरबदर होए
जियां झड़दे चनारें दे
पत्तर
हब्बाखातून चीकदी-रोंदी
उसदी चादर कुसै तुआरी लेई

किन्ना न्हेरा ऐ
किन्ना न्हेरा ऐ
डुस्की डुस्की एह क'न ऐ रोआ दा
रोने आला नजर नेई आवै दा ।

★ कश्मीरी लोककथ "हिमाल-नॉगराय" दे नायक-नायिका.

माँ

माँ !

तू मिगी स्थिती दिएं

अक्खीं कन्नें नेई दिक्ख

मिगी एह सोचियै नेई बरधाऽ

जे में जदूं

परतियै औड तां

पसारै' च छड़े पिताजी गी गै

तेरे चेतें दा धूफ धुखौंदे दिक्खना ऐ,

मेरा सफर इन्ना कठन नेई बना - माँ ।

तेरी अक्खीं च

डुब्बदे सूरजा दी मजबूरी दिक्खियै

मेरा मन कम्बा दा ऐ,

सूहे लाल रंगै दी ओह

जरीदार साड़ी चेतै औन लगी ऐ

जिसी दस्सियै मिगी भैणू ने
आखेआ हा जे तूं
अपने खीरले सफरा लेई
चेची खरीदी ऐ (कोई घोखै नेई ने
वड्डे घरै दी अन्दरा थुड़ी दी ही)
मिगी उस पंजरत्नी दा बी पता ऐ
जिसी तूं कन्ने' च पाई रक्खे दा ऐ
तां जे खीरले बेलै
जीभा हेठ रक्खी दित्ती जा,
तेरे पोत्तरे दे हत्थ
में ओह् सुर्ग-सीढ़ी बी
दिक्खी ऐ, जेह्दे राहें
तेरा अगला पैडा सखल्ला होई जाग,
सत्त नरायण दी ओह् चांदी दी मूरत
तूं आपूं गै मिगी दस्सी ही
जिसी तूं जीवनदान दित्ते दा ऐ,
माँ ! एह् सभ किश
तू इयां कीता ऐ जियां
कुआरियां कुड़ियां - जिन्दे ब्याह दी तित्थ
अजें सधोई दी नेई हुन्दी -
सालूं सींदियां न, चादरें पर
फेरमां फुल्ल पांदियां न ते
सरैह्ने पर 'स्वागतम' लिखन बेही जंदियां न;
एह् जीने दे कैसे सरिश्ते न मां
जेह्ड़े मनुक्खा गी जींदे सुआसैं

अपना परलोक सुआरने दी
तफीक दिन्दे न ?
अपना परलोक परतक्ख दिक्खदे होई बी
में राहन आं
इस लोक दा कोई बी धर्म
तेरे कशा की नेई छुड़केआ ?
अजें कल गै ते खट्टै पर बैठे बैठे
तूं अपने लागर हथें
दुखै ने मुंह धोन लेई पेई ही
एह सुनियै जे पिताजी सीरीनगरै दा
आवै करदे न
“मधु” ने तेरी सिंधिया संधूर पाया ते मत्थै
शैल बिंदी बनकाई
तूं शीशा बी दिक्खेआ - मे दिक्खै करदा हा
उस बेलै अन्दर पेई दी
जरीदार साड़ी तुगी चेतै नेई ही
पंजरत्ती, सुर्ग सीढ़ी - सब्बै किश
भुल्ली गेदा हा
जीने दा एह इच्छम दिक्खियै गै खुशबा
केइएं ब’रें थमां आई दी संझ
घनोआ नेई करदी
फी इस बैले
मिगी दूर जंदे दिक्खियै
उस संझा दे काले परछौरे
की घनोन लगे न ?

मिगी तूं इनें नजरें कत्रे
नेई दिक्ख मां !
मेरा सफर इन्ना कठन नेई बना
में परतियै औडः
बिंद हस्सियै बरधाऽ ।

(१९७० ई० च जदूँ में बड़ी खुशी ते गौह् दी खुमारी च अपनी बेजी गी दस्सेआ
जे में बम्बई च अपना फलैट खरीदी लेआ ऐ तां ओह् उदास होई गेइआं ते बोलियां,
“तूं मौके सिर नेई पुज्जना” उन्दा वाक् सच्चा सिद्ध होआ पर उन्दे पूरे होने दे
छे मूहीने पैहलें में उनेई मिलन आई’ आ हा । सत्त-अट्ठ दिन उन्दे कोल रेहिये
परतोन लगा तां ओह् मिगी बाहरले दरवाजे तोड़ी छोड़न आइयाँ । एह् कविता उस्सै
बेलै दी ऐ. गड्डी’ च बैठे बैठे लिखी ही.)

धुप्प

बरखा च दिक्खो कियां न्हौंदी ऐ धुप्प ।
खेढदी, हसदी, पसोंदी ऐ धुप्प ॥
फुल्ले' र बौह्दी ते चिक्कड़ा' च सौंदी ऐ ।
सभनें गी इक्कै न्हेई थ्होंदी ऐ धुप्प ॥
पानी दे कन्ने नि रुढ़दी कदेँ एह् ।
नदिऐ दे उप्पर बसोंदी ऐ धुप्प ।
न्हेरें गी सीकदी झट्ट अपने अन्दर ।
सदा फी बी गोरी गै रौह्दी ऐ धुप्प ॥
सत्त समुन्दरा दा लेई जंदी गासा ।
बदलेँ दी स्हेली बझोंदी ऐ धुप्प ॥
ब्हाऊ ने चोरिया जप्फियाँ पारदी ।
मचली सदा बनियै रौह्दी ऐ धुप्प ॥

खेढदे भुंजां न मोती हजारां ।
वूह्टे चा जेलै छनोंदी ऐ धुप्प ॥
बंद करी भित्ते गी एह नेई डकोंदी ।
उगघड़े दे भित्ते गै थहोंदी ऐ धुप्प ॥

बूहटे

चुप चपीते खड़े खड़ोते ।
सदियां लंघी आए बूहटे ॥
दूरें पारें भरे दे जंगल ।
कुसने इन्ने लाए बूहटे ॥
इन्दे सुआस सुआस न स्हाड़े ।
एह स्हाड़े मां-जाए बूहटे ॥
बट्टे मारो तां फल दिन्दे ।
किस दुनियां थों आए बूहटे ॥
रुंडे-मुंडें पौंगर पेई गेई ।
बूहटे दे घर आए बूहटे ॥
कुड़िएं चिड़िएं राहड़े राहए ।
बनी परौहने आए बूहटे ॥

सलाखें दे पार

जेला दे अन्दरा दिक्खियै
चढ़दे सूरज गी
सलाखें दे पार
एह बझोआ पुराने कैदी गी
कैद ते सूरज ऐ
में आं आज़ाद !

ईश्वर

गौतम बुद्ध ने नां मन्नेआ
नां नकारेआ
ईश्वर दे बारै ओह चुप गै रेहा
जदूं उन्न निर्वाण प्राप्त कीता तां
उदे अनुयायिएं उसी
ईश्वर बनाई ओड़ेआ
ओह बुद्ध दे बगैर रेही सकदे हे
ईश्वर दे बगैर नेई;
तालिबान ने ईश्वर दे नां पर
बुद्ध दिएं मूरतें गी तोपें कन्ने
डुआई दित्ता, ईश्वर दा
इयै आदेश ऐ - उनें आखेआ
में सोचा करनां - अजें में इन्ना गै
लिखेआ हा जे बारी बिच्चा

सूरज दी इक किरण
मेरे कमरे च संजरी आई ते
बल्लें बल्लें मेरी इसै नोटबुका पर
धुप्पा दा इक निक्का सारा
गोला चमकन लगा
ओह्र हस्सा करदा हा
में धुप्पा दे उस टुगड़े पर
लिखेआ - ईश्वर !

दुख

दुख नराश होइयै
जा करदे हे मिगी छोड़ियै
की जे में
खाहशें दा पीछा करना
छोड़ी ओड़ेआ हा,
चानक उनें पिच्छें मुड़ियै दिक्खेआ
मेरी अक्खीं च अत्थरूँ हे
ओह् हरान होए
उनें गी पता नेई हा जे
माहनूं
दूएं दे दुखा कन्ने बी
दुखी होई सकदा ऐ ।

सरकस

सरकस दा मास्टर हरान ऐ
परेशान ऐ
शेरा गी पिंजरे चा बाहर ते
कड़्ढी ओड़ेंआ
हून ओह् अन्दर नेई जा दा
बथेरे उट-नट कीते
शेर मन्ना दा नेई
खाने गी पवा दा
लोक इसी खेढ गै समझा दे
खुश होइयै जोरें जोरें ताड़ियां
बजा दे
शेर अड़ी गेदा ऐ
मास्टर डरी गेदा ऐ
लोक ताड़िया बजा करदे न ।

इक तेज दरेआ आंगर

इक तेज दरेआ आंगर
समानां चाहनां तेरे अन्दर
में
लगातार, इकतार ।
तूं समुन्दर ऐं
खिच्च मिगी - होर खिच्च
होर
लगातार, इकतार ।

ज्हाजा च बैठे दे, बारी चा दिक्खदे होई

ज्हाजें गी अपने उप्परा

लंघदे दिक्खियै

बदल

नराज नेई हुन्दे, ओहू ते

उनें गी अपना वजूद चीरियै

लंघी जाने दी इजाजत दिन्दे न,

बदल खढालां न

असमाना दी गोदा च

न्यानें साई

खरगोशें साई छुत्त कीते दे

लंघी जाने आले ज्हाजें गी

टाटा करियै बरधांदे न

उन्दे स्वातमै च जेहड़ियां विजलियां

सुत्ती दियां हुन्दियां न

ओह् ज्हाजें गी किश नेई आखदियां
ओह् उसलै जागदियां न
जेलै जागने दी रुतत औंदी ऐ
झमाणी मारियै जेलै ओह्
मिलकदियां, कड़कदियां न
तां फुल्लें आंगर हौले बदलें दा
स्वातम बज्जर होई जन्दा ऐ
ते मस्तोई दी बरखा बनियै
धरती ने बे-ब्लाऽ समागम करदा ऐ,
उन्दे मलाप दा चरम पल
मुक्कने पर नेई औंदा
झड़ियां लग्गी दियां रौंहदियां' न
रज्जियै ब'रियै खीर बदल
समाई जंदे ने धरती इच;
सूरज काह्ला पेई जंदा ऐ
अपने पुत्तरें दा
आत्मघाती समागम दिक्खियै
उदियां किरनां धरती गी
तपांदियां' न
हुशकांदियां' न
औने आले समागम दी लालसा च
धरती अपने अंदर जच्च होई गे दे
प्रेमी गी लहुआ चा नखेड़ियै
परतांदी ऐ, पर उदे
चेतें दे फुल्ल अपने सीने पर

सजाई लैंदी ऐ;
बदल फिरी असमाना दी गोदा च
मठोन लगदे न, भरोन लगदे न
बिजलियां फिरी उन्दे अन्दर
संजरोन लगदियां' न;

इसलै बदलें दे बिच्चा
ज्हाज लंघै दा ऐ ते
उनें गी धरती दे प्यारा दा
सनेहा थोआ दा ऐ,
में हेठ जाइयै
धरती गी बदलें दे प्यारा दा
सनेहा देड ।

लहू दा मोती

में अपने मना दा इक हिस्सा
सबज मखमला दी डब्बी च
साम्भियै रक्खेआ हा
इक चमकदे हीरे साईं
अज्ज उसी खो'ल्लियै दिक्खेआ तां
ओह सूहा मोती बनी गेदा हा
में उसी चुक्कना लाया तां
ओह चकोआ नेईं
घुली गेआ
सारी डब्बी लहुआ ने
भरोईं गेई, मेरी उंगलियां बी,
एह जैदात
जेहड़ी पुश्ते दी कमाई ही

इसी केह् होआ ?
कु'न परता देग ?
इस चुपनझूक च
सुन्न पेई गेई दी ऐ सरिश्ती
मिगी कुसा आगमा साई
फुरन लगी ऐ
बलेल
कन्न लाई में सुना करनां
कुसा कुक्खा च रोआ करदा ऐ
अनजम्मेआ आदम
उदे राने च उदे भाग बी
शामल न
दोयै इक-दूए लेई रोआ करदे'न
आदम भागें लेई
भाग आदम लेई
दौनें दा जनम इयां होआ
जियां अग्गी दे लोरें चा
चिंग्याड़े फुटदे न,
लावे दा हाड़ खरपदा, उंबलदा
आवै दा ऐ
पुश्ते पटोई गे
फकोई गे रुक्ख जढ़ें समेत
रुढ़दे आवै दे घर-मकान

मैहल-मनारे
मंदर-मसीतां
सभनें दियां नीह्आं उप्पर
गुमटियां ते बुरजियां हेठ
पाक-पवित्तर कताबां
बरका-बरका बली गेइआं
शब्द चीका दे
अर्थ रोआ दे
रोने दी अवाज कोई नेई सुना दा
उन्दे कशा मतियां उच्चियां न
हत्थ-गोलें ते राईफलें दियां अवाजां
इतिहास दे किन्ने ध्याऽ
तोपें दे मूहें साई
अग्गी दे गोले उगला करदे न
गोलें दी बरखा च
थाहर थाहर सुंघा करदे न
सूह लैंदे पुलसी कुते
संगीत सभाएं च
अदबी गोशिटएं च
सिनेमा-हालें च
अज़ादी दे जश्नें च ;
गणतंत्र दिवस उप्पर
मार्च पास्ट करदे बच्चें

सगंध खादी ऐ देशा दी रक्षा ताई
पर ओह्र सेही सलामत घर पुज्जडण
एह्र कुसै गी पता नेई
इन्दे च गौतम बुद्ध दा जातक
राहुल बी ऐ
बालमीकी दे आश्रम थमां आए दे लव, कुश बी
गुरु गोविंद सिंह दे चारै लाडले
ते करबला दी प्यास पी जाने आला
इमाम हुसैन दा लख्ते-जिगर बी
इन्दे सारें दे मत्थै पर
जिन्दगी ने अपना कम्बदा कम्बदा
हत्थ रक्खे दा ऐ
इन्दे हत्थें-पैरें च अनगिनत खाह्शां
लैफ्ट-राईट, लैफ्ट-राईट करा करदियां न
सारें दी अक्खीं च अपना अपना
ऐवरैस्ट ऐ
जलूसा दे अखीर च
चिट्ठी चादरी'च लपटोई दी
इक जनानी मूरता साई
बल्लें-बल्लें टुरदी आवै दी ऐ
उस दा नां मरियम ऐ
उत्र छाती कत्रे इक 'क्रॉस'
लाइयै रक्खे दा ऐ

उसी पता ऐ जिस पुत्तरै गी
उन्न जनम देना ऐ उसी
किस चीजा दी लोड़ पौनी ऐ ;

एह केह त्रुट्टने दी अवाज आई ऐ ?
शीशे आंगर त्रुट्टी गई ऐ
मेरे अन्दरै दी खमोशी
कोई कुप्पड़ आनी पेआ ऐ
फाड़ा दे गर्भा च सुत्ती दी झीला इच
पुल्ले-नर्म बदलें गी बिजलियं
चीरी ओड़ेआ ऐ
झड़ी लग्गी पेई ऐ
लहू ब'रन लगा ऐ
एह लहू उस्सै मोती चा चवा दा ऐ
पैहलें जेहड़ा हीरे साईं चमकदा हा
मेरे मनै दा हिस्सा हा ।

गज़लां

(1)

बोलने दी सजा ऐ चुप रौहना
स्थाड़ा ते बोलना ऐ चुप रौहना ।
कोई झांकन इदे' च औंदा नेई
जंगलै दा तलाऽ ऐ चुप रौहना ।
उड़दी खुशबू ऐ भाख फुल्लै दी
उसदा मुंह खोलना ऐ चुप रौहना ।
मार डाह्डी ऐ धुप्प - बरखा दी
फी बी रुक्ख दा सुभाऽ ऐ चुप रौहना ।
दिक्ख पेंटिंग कोई बसोहली दी ✓
बोलने दी कला ऐ चुप रौहना ।
रौला किन्ना चन्हां ऐ पाई जादा
गजपतै दा किला ऐ चुप रौहना ।
इन्ने रौले 'च, चीको-झाड़े 'च
असें सिक्खी लेआ ऐ चुप रौहना ।

केह् पता बख्ख केह् ऐ ते घट्ट केह् ऐ
धुप्प - छां दा रत्ताऽ ऐ चुप रौहना ।
बोल्ले-तोल्ले' च पासकूं रौहदा
सच्च सच्च बोलना ऐ चुप रौहना ।
सुनने आला सुनी गै लैंदा ऐ
सूफिएं दी सदाऽ ऐ चुप रोहना ।

(2)

घरै' च नेईं जरोआ घर
दूरें जाईं बझोआ घर ।

सारी उमर घरै इच कट्टी
सारी उमर नि थोआ घर ।

सारे कुलै दा नाश होई'आ
सूरज साईं घरोआ घर ।

हड्डें गी लहुआ ने चिनेआ
तां कुलै शैल चनोआ घर ।

पीड़ां झड़ियां बनियै ब'रियां
केहूँडे थाहर नि चोआ घर ।

अकखीं चा अत्थरूँ जैं निकले
फी नेईं कदें जनोआ घर ।

रातीं इसगी रोंदे सुनेआ
मेरा दर्दी होआ घर ।

आखर थोड़ी लो ते होई
अपना भाएं फकोआ घर ।

(3)

स्थाड़े कन्ने आप सडै दी ऐसी दाहली रात
स्थाड़ी अक्खी बिच बेही रेही दी बनी निहाली रात ।

हुन स्थाड़ी किस्मत इच कुथैं उंदे आली रात
नां चेते नां सुखने भलेआँ खाली खाली रात ।
तारे गुमसुम, झौंगर सेई गे, नां कथां, नां डूरे
किश ते रोह्ल र'वै इस करियै असें बझाली रात ।

सारी रात सूल चेतें दे जिन्दू इच क्या खुब्हे
भ्यागा अपने लहुआ दे बिच असें खंगाली रात ।
अपना आप गुआने दा चा इसदा दिक्खो
बड़लै दी हीखी इच बैठी दीए बाली रात ।

(4)

अजें थोड़ा लेहाज बाकी ऐ
मूल डुब्बा बेयाज बाकी ऐ ।

असें आपूं गै जैहूर पी लैता
फी बी उन्दा तराज बाकी ऐ ।

स्थागन आए बमार करने गी
एह कनेहा रवाज बाकी ऐ ।

इनें पीड़ें दा बी भरोसा केहू ?
अजें इन्दा अलाज बाकी ऐ ।

स्वातमै इच न पेदे भन्न किन्ने
स्थाड़ी फी बी मजाज बाकी ऐ ।

(5)

तेरी देहू दी बाशना ऐ रात
मेरी देहू दी कामना ऐ रात ।

आचरै दी ऐ त्रेल छाती इच
कोहूदी अक्खीं दा कुरजना ऐ रात ।

इस कलापे च रोहल उन्दी गै
बेबसीलें दा आसरा ऐ रात ।

सुत्ती-सुत्ती दी ब्हाऽ बगा दी ऐ
मेरे प्राणें दा जागना ऐ रात ।

अनसनोची बलेल सुनचै दी
चुप्प घड़िणं दा बोलना ऐ रात ।

हत्थ आवै दे पल गुआचे दे
अपने आपै गी तुप्पना ऐ रात ।

भ्याग होनी तां अक्ख लगनी ऐ
सारी उमरी दा नींदरा ऐ रात ।

(6)

गुंझलें चा में तार खिच्चा नां
तेरी अक्खीं चा प्यार खिच्चा नां ।
हत्थ आवै दे पतझड़ै दे रंग
कोह्दे बागा दी बहार खिच्चा नां ।
तेरे इच्छमै दा एह् करिश्मा ऐ
आपूं अपना लंगार खिच्चा नां ।
हौली हौली ओह् नेड़ै आवै दे
बल्लें बल्लें तबार खिच्चा नां ।
रास मुक्की ब'रे-छमाहिणं दी
हून पल पल दुहार खिच्चा नां ।
मन बरागी, सुभाऽ अनूरागी
अपने अंदर गै काहर खिच्चा नां ।
मन मिगी दूर पार लेई जा'दा
में मना गी रुआर खिच्चा नां ।

(7)

अनलिखिएं लिखतें गी पढ़ियै भरम गै बधने
अनदिक्खी दी मूरत घड़ियै भरम गै बधने ।
सोची सोची, घोखी घोखी फामें होंगे
अनचित्तरे दे चित्तर मढ़ियै भरम गै बधने ।
गासा बद्दल भुंजां उन्दे छौरे टुरदे
फिरदे टुरदे छौरे फड़ियै भरम गै बधने ।
बिच्च सारै दे हस्सै दा एह चन्न नि स्हाड़ा
मनै' च उसदी मूरत घड़ियै भरम गै बधने ।
जेह् डे रूप-शलैपे आपूँ भरमे पेदे
उंदे चक्करब्यूह इच बड़ियै भरम गै बधने ।
अपने आपै कशा नस्सियै कुथें जाना ?
अपने आपै कन्ने लड़ियै भरम गै बधने ।

(8)

अपनी बोल्ली आपूं लागे
तां हिरखै दी पीड़ कमागे ।

मुक्त होंगे, हर स्थान चकागे
अत्थरुएं दी रास मुकागे ।

सारी सरिश्टी साह् रोकी लैग
अस प्यारा दा गीत ओह् गागे ।

फसल हीखिएं दी केह् करनी
चेते राह्गे, दर्द उगागे ।

तीला तीला होई जिन्दड़ी
कियां इसी छाती ने लागे ।

जो राहेआ ओह् उगेआ गै नेई
जंदे जंदे फी किश राह्गे ।

सदा लेई अस चुप होंगे तां
अन्दरा उच्चियां भाखां लागे ।

जिसदी तैह तक अस नेई पुज्जे
ओह क्हानी अस कियां सनागे ।
उनेई ते उस समझाई बी लैगे
अपने मना गी कियां मनागे ?
जागी पे अस सुखने दे बिच
उलझी गे किश होर बी धागे ।

(9)

आदमी गी दिक्खो जींदा किन्ने संसारें इच

मनै इच, घरै इच, प्यारा ते रुजगारें इच ।

जीभ, अक्ख ते मन त्रैवे बोलै दे न बक्खो बक्ख

स्वातमै गी बंडो नेई इन्निएं वी काहरें इच ।

ज्हारां इच्छम मिगी इक म्हानू इच लब्बा दे

लोक इक इच्छम कियां तुष्पी लैंदे ज्हारें इच

इस गी नेई पता इदी आत्मा दी मंग केह् ऐ

आदमी गुआची गेआ भीड़ें इच न्हारें इच ।

जिनें कदें अपने गै लहुआ दी नेई बाज सुनी

उनें गी केह् लब्भना ऐ कारकें ते बारें इच ।

(10)

भरमें दी धुंधा इच पैडे नेई मुक्के

अध्यासैं दे जाड़ा घास बनांदे रेह् ।

दिखदे रेह् शीशे इच कोई होर गै चेहरा

अपने भाने अपना रूप सराहंदे रेह् ।

की दसदे तौफीक कुसा गी अस अपनी

अस ते अपने आपै गी बनझांदे रेह् ।

इस चाल्ली अनजान बनी धोखे खादे

धोखे देने आले बी घबरांदे रेह् ।

सच ऐ मता चिर न्हेरें बिच तुस रेह् दे हे

लो आई तां झकदे ते शरमांदे रेह् ।

(11)

सूरज दा डुब्बना बी शैल

प्यारा दा बुझना बी शैल ।

दीए दा जगना मनभांदा

धूफै दा धुखना बी शैल ।

चेतें दी रोहली ते जीना

कदें कदें भुल्लना बी शैल ।

नामैहरम हास्से कित लाने ?

सज्जनें दा रुस्सना बी शैल ।

केह करनी इन्नी हुशियारी

कदें कदें खुंझना बी शैल ।

निम्बल ते होने गै चाही दे

कदें कदें सिज्जना बी शैल ।

(12)

बदलें किन्ने रिशमां ब्होइयां
पागल कूजां गबभन होइयां ।
डार, डार कम्बै सुरताले
भाख भाख लैहरां संजरोइयां ।
चीड़े दे मन काहले पेई गे
धूड़ां यादां बनी घनोइयां ।
बिज्ज तरारे कन्ने मिलकी
अंग अंग चिंडां मरड़ोइयां ।
अंग-मलावा इन्ना सुच्चा
देहां होर कुआरियां होइयां ।
अक्खीं चा अत्थरूँ क्या निकले
खाह्शां मना चा जै बरधोइयां ।
जेहड़ियां गल्लां नेई बलोइयां
ऊयै शैल उनेई समझोइयां ।

(13)

कंडें इच हुन केह पलचोना
नां किश थोना, नां गै दनोना ।

असेंई खढाँदा रेहा सदा ओह
स्थाड़े हथ हा जेहड़ा खढोना ।

नां अस गाहक नां हट्टी आले
फिरी बजारा इच की खड़ोना ?

तेरी हद्दा इच बेहद ऐ
तेरा होना उसदा होना ।

ढक्का उप्पर ढक्क नि लब्भा ।

इस ढक्कै पर कियां चढ़ोना ?

ईयै ते संसार ऐ यारो
स्हेड़ स्हेड़ियै नंद लेओना ।

तुं दे भाऽ सभ गल्लां मुक्कियां
स्थाड़े भाऽ किश खतम नि होना ।

समझ नि औंदा किश बी यारो
की टपलोना ? की सम्हलोना ?
जे मेले बिच गुम होना ताँ
की मेले रा जानूं होना ?
उमर बिहाई ईयै दिक्खदे
आपूं डिग्गना आप खड़ोना ।
किन्ना सौखा तोल तोलना
किन्ना औखा आप तुलोना ।
असें भाग रुक्खें दे लेई ले
कदे बढोना कदे दलोना ।
पीड़ें दा इक पल सौना गै
खुशिएं दा औना बरधोना ।
केहड़ी आसा पारें जागे ?
क्या पारें कोई पार नि होना ?

नमियां भाखां

(1)

नेई आखो लग्गी गई लाम
नेई नींदर औनी
नेई सुखने औने
नेई कैत झतोने
दिन कियां कटोने
साहू कियां लैना मेरे राम
अस इक्कले इक्कले
दुख कुसी सुनाचै
कोई सार नि लैंदा
न्हैरे'च गुआचे
स्थाड़े कत्रे डुब्बी स्थाड़ी हांब
नेई आखो लग्गी गई लाम

(2)

गुपचुप गुपचुप पुज्जा दे सनेह
जियां रातीं पौंदी ऐ तरेल
जियां चाननी बड़दी बेह्रै
जियां जंगलें पौंदियां धूरां
जियां फुल्लें चा आवै खुशबो
कुसै गी नेई लगै कनसोह
होर नि किश बी इच्छेआ
बस औंदे रौहन सनेह
गुपचुप गुपचुप

(3)

अस्सै नेई हे थ्वाड़े जोग
ताइएं तुसें तज्जेआ ।
स्थाड़ा मान, स्थाड़ा गौह
घड़े साईं भज्जेआ ।
दाग तुसें दिता, स्थाड़े
मत्थै शैल सज्जेआ ।
हेज लाइयै तुन्दे कत्रे
मन नेइयों रज्जेआ ।
करो कोई हीला फिरी
कत्रे कत्रे रौहचै अस ।
तांहग इयै जुडीं जुडी
तुन्दे कत्रे बौहचै अस ।

(4)

भेतिए स'त्र लाई
पुट्टी भलेआं कंध
कुफल खु'ल्ले आप
लटी पटी गेई
बचेआ कक्ख नेई
अस सक्खने-मुक्खने
डंडकारां सूँकन

(5)

तुप्पे आप शकारी
मन मरजी दी चूग
मन चित्त लग्गी फाही
हस्सी पसोई जिंद बारी
बाकी किश नेई
किश नेई, किश नेई

(6)

तूएं दस्स तुगी कियां मनाना
अस अनभोल
केह् ऐ सहाड़े कोल
कड़्ढी लै प्राण
जिन्द मित्तिया'च रोल
बोल भाएं नेई बोल
दस्सी जा इत्रा
तेरे हिरदै कियां समाना
लगी कथाहर
नेई कोई अरोचार

(7)

चित्त बरागी कित्त लाना
नां मंगदा
नां झोलिया किश पांदा
बखला बनियै हेज करदा
सज्जन बनियै सदा ठगदा
कियां इसदा भेत पाना
कियां इस दा पार पाना
ओचन जी
इक्कलसोखी

(8)

तेरे दुखा ने किन्ने दुख जगाए
भुल्ले दे जखम चेतै उठी आए
पच्छै पर पच्छ कियां जरना
अत्त सैहनी हाय नेई करना
जींदे सुआसैं मरना
एह् कैसा रोग जी ?

(9)

थ्वाड़े कोल आइयै बनी जागे
थ्वाड़े नेह, थ्वाड़े जोग
मित्तरा ओ
इयै स्हाड़ी इच्छेआ इयै चाहना
असें गी नेई चज्ज हेज कियां लाना
असें गी नेई औंदा लाना-पाना
असें छड़ा बारी देना अपने गी
जिन्द जान जी
औन देओ कोल

(10)

अपने गै सामनै गुआचा देआं अस
जियां दिना बेलै सुखने गुआचदे
जियां जंगलें च रस्ते गुआचदे
जियां पानिया'च रंग घुली जंदा ऐ
जियां न्हरे'च चंगैड़ा बुज्झी जंदा ऐ
जियां ब'री ब'री बदल मुक्की जंदे'न
जियां कंडिया तलाऽ सुक्की जंदे'न
अपने गुआचने दे
आपूं गै गुआह अस

(11)

दुख बरूहपिए सुख बनी आए
करी गे स्हाड़े कन्ने छल
पल भर असें गी हसाया
झूठें झूठें मन परचाया
उप्परा उप्परा दिलजोई
दिला च दर्द नि कोई
वेक्यासें नेई दिक्खेआ
सोह्ल जिन्द
भलेआं रूली गई

(12)

दीआ ते बुझाई लैता
चन्नै गी फूक कियां मारनी ?
चाननी खलारी सुद्धी
कियां जाना असें घरा बाहर
मित्तर निहालपा दे पार
लोक बैरी लादे कनसोह
प्यार पाना सौखा नेइयों
साह लैना सौखा नेइयों
अस निरालंब
परबस्स

इ'नें कविताएं बारै इक चिट्ठी

कुवेत

२० अप्रैल २००९

आदरजोग वेद जी,

नमस्ते ।

थुआड़ी चिट्ठी थोई जेह्दे च थुआड़ियां किश कवितां वी हियां . एह चिट्ठी ते कवितां में केई आरीं पढ़ी चुकेआं. हर बारी नमें नमें ख्याल औंदे रेह. में रहान आं जे तुस बम्बई जनेह शैहर दी खौहदल ते खप्प इच ते “वीर सावरकर” ते दुइएं मसरूफियतें दे बावजूद कविता लिखने दा ते चिट्ठियां लिखने दा समां कियां कड़्डी लैंदे ओ. **Albert Camus** ने कुतैं आखेदा ऐ - *Man can not be hypocrite in his pleasures* . जिस कम्म च मनुक्ख गी आनंद औंदा ऐ, उसी कीतै बगैर ओह नेई रेही सकदा. कविता लिखना वी थुआड़ी किश न्हेई मजबूरी बनी गेदा ऐ. में सोचनां जे कला दा इन्सानी जिन्दगी च इक एहम् स्थान ऐ. एह गल्ल बक्खरी ऐ जे Science, technology, business ते दुए Matrially productive कम्में दे मुकाबले च एह्दी पुच्छ-पड़ताल उत्री नेई जित्री होनी चाही दी ऐ. पर इ'नें मुश्कलें दे बावजूद किश मनुक्ख इस कम्मै च लगगे दे रौहंदे न. महान चित्रकार Van Gogh ने आखेआ हा - *I can live without God, but I can not live without that force whcih compels me to create.* कलाकार दा भगवान इयै सृजन-शक्ति ऐ. इसै सृजन-शक्ति गी टैगोर ने जीवन देवता आखेआ ऐ. इस गल्लै गी में किश इयां सोचनां-

कविता शब्द न,
 शब्दें दा इक विशेष प्रयोग
 इक अन्दरूनी जरूरत गी पूरा करने लेई
 इक जरूरत - उन्नी गै जरूरी ते शिद्दत भरोची
 जिन्ना सैक्स :
 कला ते सैक्स दोयै सृजन करदे न
 इक जिस्म दा
 दूआ रूहै दा,
 कविता बिना मनुक्ख बस शरीर ऐ, वैहूशी ऐ
 कला कत्रे गै मनुक्ख
 सेही म्हेनै च मनुक्ख बनदा ऐ.

धुआड़ियां नमियां कवितां मेरे सामनै न. इन्दे च कमाल दी
 परिपक्वता, समझ, जिन्दगी दी कौड़तन ते मठास दा खूबसूरत
 Balance ऐ. “शब्द” कविता दा हर इक Stanza अपने आपै
 च इक मुकम्मल कविता ऐ ते अर्थ केई परतें च न. बिम्ब नवीन-नमें
 न.

अस्तित्व इक अथाह समुन्दर ऐ ते जिन्दगी इस समुन्दर
 इच तैरा करदी ओह तलिस्मी मछली ऐ, जेहूड़ी झलकारे मारदी ऐ,
 पर हत्थ नेई औंदी. कवि समुन्दरा च चलोबी मारियै उस मछली गी
 फड़ियै असें गी दस्सने दी कोशश करदा ऐ. बड़ी ममूली हुन्दी ऐ
 ओह कविता जेहूड़ी शब्दें दे जाल इच मछली गी फड़ियै कंठे पर आई
 पटकदी ऐ, असें गी मछली लभदी ऐ, पर मरी दी. बड़ी शैल कविता
 हुन्दी ऐ ओह जेहूड़ी शब्दें दे जाल गी समुन्दरै च सुटिट्यै मछली गी
 समुन्दरै च गै रोहन दिन्दे होई कैद करदी ऐ ते असें गी मछली दसदी
 ऐ (पर जाल इच). महान कविता ओह कविता ऐ जेहूड़ी शब्दें राहें

असेंगी उस समुंदरा च लेई जंदी ऐ ते मछली अल्ल इशारा करिये
छोड़ी ओड़दी ऐ असें गी बी ते मछली गी बी-इक दूए गी दिक्खने
समझने ताई . “पानी च लब्बा करदे तारें साई समझो शब्दे गी, ते
उन्दे अर्थ उपपर दिक्खो असमानै पर चमका करदे.” धुआड़ी कविता
‘शब्द’ त्री Category च औंदी ऐ ।

धुआड़ी दुई कविता ‘चुप रेहियै प्रार्थना कर’ पढ़ियै में रोई
पेआ, ते मेरे अत्थरुं बी केई कहानियां सनाई गे.

फुल्लें’र बौह्दी ते चिक्कड़ा च सौंदी ऐ
सभने गी इक्कै न्हेई थोंदी ऐ धुष्प ।

वेशक्क, पर सारे इसी फड़ी नेई सकदे. हुन्दे होई बी इसी
लेई नेई सकदे. एह वस उ’नें गी थोंदी ऐ, जेहड़े न्हेरे गी अपने
अन्दर सीक्री लेंदे’न-

न्हेरे गी सीकदी झट्ट अपने अन्दर
सदा फी बी गोरी गे रौहंदी ऐ धुष्प ।

खेहदे भुजां न गौती हजारं
बृहदे चा जैलै छगौंदी ऐ धुष्प ।

एह मौली उरगै मनुक्खै गी थोंदे न जेहड़ा अपने अन्दर
दो धुष्पा गी डिम्बलन नेई विवा.

कईयां कवितां लखीयां न जित्ते च बिडम्बना ऐ, डर ऐ,
कौटान ऐ, गुस्सा ऐ, न्दारेबाजी ऐ, बड़्ठे बड़्ठे फलसफे च. मातम
ऐ जित्ती दी खुबसूरती दी मौन बा. पर बापी बापी कविता लमबी
ऐ जेहड़े च श्रीह् खुबसूरती सादे मामने कवि आनी लहेम्बा ऐ. इयै
न्हेई खुबसूरती ७७-३७ साल की उमरि च गे लमबी ऐ. बाव इव मने
मारे कविता कोल रेडी जाले न जेरे ते जेरे गी मयाने लेई बड़्ठे
बड़्ठे फलसफे, धुआड़ी उमरि च उमर खुबसूरती गी दिक्खी सकला

ते लिखी सकना इस गल्लै दा सबूत ऐ जे तुसें उस धुप्प गी, उस खूबसूरती गी, उस उमीद गी अपने अन्दर खतम नेई होन दिता. में एह खूबसूरती इन्नी सफाई कत्रे नेई दिक्खी सका दा. इस्सै करियै में हून कविता नेई लिखदा, फलसफादान होई गेदा आं. फलसफा उस गुआची दी कविता दी खोज ऐ ते कविता खोज नेई बस खूबसूरती ऐ. में समझना जेहूड़े लोक कविता दी खोज इच लग्गे दे'न उन्दी खोज सराहने जोग ऐ. पर उन्दे कशा बी सराहने जोग लोक ओह न जि'नें गी कविता थोई जन्दी ऐ. ते उन्दे कशा बी उप्परली पौड़ी पर खड़ोते दे ओह लोक न जेहूड़े छड़ी कविता लिखदे नेई, बस आपूं गै इक चलदी-फिरदी, जींदी-जागदी कविता बनी जंदे'न.

मिगी इन्तजार ऐ थुआड़ी फिल्म 'वीर सावरकर' दा ते थुआड़े कविता संग्रह दा, ते मेरियां शुभ कामनां हमेशा थुआड़े कत्रे न.

मेरा हिन्दुस्तान औना दिक्खो कदूं हुन्दा ऐ. आभा ते मेघा जनवरी-फरवरी दे म्हीने च दिल्ली-जम्मू रेही आए'न. हून निर्झर अमरीका दा हिन्दुस्तान ७ मई गी जाग. उत्थैं त्रै हफ्ते रौहग ते मेरी माता जी गी लेइयै इत्थैं कुवेत आई जाग. ओह इत्थैं २-३ म्हीने रौहडन ते निर्झर कोई २ म्हीने रेहियै वापस चली जाग.

दर्शी जी गी आभा दी ते मेरी नमस्ते.

थुआड़ा अपना
अरविंद

Gandhi Memorial College Of Education Bantalab Jammu

